

陳文忠公遺集

何耀光署



上冊

陳

文

忠

公

遺

明

陳

子

壯

樸

Digitized by the Internet Archive
in 2010 with funding from
York University Libraries

明陳子壯撰

陳文忠公遺集

何氏至樂樓叢書第十四

新
一九七六年丙辰十二月景印
清道光伍氏詩雪軒刻本
集

即新子集

陳

文

忠

公

讚


集

十


一

卷

陳子壯像



關子州



陳子壯自書詩軸

杖屨滿百錢
取富一生福
說與
以爲居然
陳子壯

陳子壯自書詩軸

主人忘物候佳時心銷海燕將春色
一度遙寄花時自喜東風自只同風
為信張
文獻公詩序集
詠暑中燕
客之詞先
陳子壯

重印陳文忠公遺集序

余讀屈翁山皇明四朝成仁錄深慨乎明季忠烈之士不惜捐軀報國前仆後繼若吾粵陳文忠子壯陳忠愍邦彥張文烈家玉之死尤爲悲壯世稱爲後三忠者也竊以爲吾國之大雖有山川之固土物之豐與人民之衆然其所以立國數千年屢經外患而亡者豈非文化之盛與民氣之浩大也哉頃於坊間得見陳文忠公遺集爲南海伍氏校刻粵十三家集本距今百餘年流傳頗罕海外公私庋藏類多漫漶

承曹君思健惠假初印本補完之亟付鉛槧附以公
之沙貝鄉人舊撰行狀用廣流傳夷考文忠公胸羅
經濟學究天人早歲立朝於興革諸端具陳精審當
崇禎之際邊患日亟公廷對廟謨輒紓宸慮及至隆
武偏安圖謀興復亦富嘉猷初典試浙江發策問歷
代宦官之禍以勵士氣事畢還京陛見侃侃面奏冀
清天聽是其揭姦摘伏已先進讜言矣迨後魏闖專
橫靡有顧忌尙擬辱公墨瀋此豈公所屑爲者也彼
馬阮輩導上聲歌丐撰曲詞則不容不嚴詞以斥其

疾惡黜邪大都如此卒以群小傾陷見幽四閱月中
神明不疚旣脫囹圄旋亦起用於是疊助餉械以裕
軍需散賑粵饑存活鄉土肫肫其仁又如此者及至
山河破碎間關閩粵極費蓋籌尤復登陴退賊親解
雄州之圍足見指揮若定智勇雙全於是寵眷益隆
敕兼兵禮二部藉挽危局獨惜紹武建元閱牆兆禍
遂使屢攻廣州未能奏凱負固西江難回浩劫卒至
矢盡兵殘忠烈殉國能不悲哉公遺稿頗有散佚具
見伍氏跋文然窺豹一斑亦足沾溉來禩故後之讀

者翁山彰其秋痕顓園詠其秋日是痕也日也乃兩
儀之精光亘千古而不滅此吾所以悚然而敬勃然
而興者也公別著禮部存稿八卷昭代經濟言十四
卷經濟考略八卷先後刊入廣東叢書及叢書集成
中昔年余旣刊永曆本張公軍中遺稿於叢書中矣
他日倘得陳公巖野集而梓之則余之厚幸而馨香
祝願以求者也公元一九七六年冬日何耀光謹序

練要堂集題詞

有謂謂之其言必昌無謂謂之其言必瘁拾唾以陳言
畫樣以成文掇山青水碧草草閒花之語以了詩皆無
謂謂之者也雖然無所得而明所見猶無謂也古之人
於書無所不窺事理無所不究無不畫然於心而後畫
然於手與口大爲瑰詞細則玉屑雖遊戲翰墨卒然而
作而意趣器識非凡所同譬醪之於水輕重自異卽有
等者譬於比玉有其厚倍之者矣經濟大也爲詩賦而
有餘詩賦小道爲經濟無不足類從條貫爲物不二未

易爲耳食者道也今舉集生之詩若取他人能詩者與較奚啻其厚倍乎集生初登上第余與之書以儲養相期勉集生答云吾於交不敢濫也人而有記焉吾於聞不敢漫也言而有記焉吾於日不敢玩也時而有記焉其用心也勤矣其有所得而出之也素矣厚不亦宜乎人傳江陵旣入館不復爲酬應流連之文馮用韞亦然盡絕駢韻頰首而研磨類編若士子之將試於主者彼固各有注也然陸敬輿以駢四麗六之語妙天下裴晉公日與賓客賦詩爲鄭重其用彌全者其智彌及集生

固法其上者哉庚午仲春清明日會稽友人陸夢龍拜
題

陳文忠公遺集卷之一

明南海陳子壯集生著

練要堂集

賦

端陽菊花賦

月令平分兮錯卉越芳受區膏滋兮苑舒靡常省鞋賓
之布護髮鵝首之標陽懷懋懋其視蔭客霜膚之所嘗
介一莖而靜至兮畦人告予以猶疑日表傾其亭特赤
岸際其依而本受露以明性亦流風而引輝颯金氣於

南交感尋收之見推伊幽貞之如就奉君子之光儀淺
體輕跌慕璣浮玉蔚蔭蕭蕭要影森然緩疏夢葭釋邪
蛻俗鳳子遙巡伯趙驚翻蘭術僑居冀庀借錄當日及
之屢遷而葵穠之爲族旣相兮娑娑又創兮不欲也南
山兮逶迤鄉節兮款會繼宛轉兮馳江介絡水車兮明
游旆乃漾幽棕灑蕊韻選沙棠之素艤緣扶荔而並進
邁靈均之女嬃兮潛容與而興問言采兮芳洲羌獨兮
胡由匪秋英之遽速寧搖落之徂留總先暮以何礙焉
委運之是周皇天賚斯以一切孰人數之可謀旣糟醕

之弗入盍闕息乎甘流能月服而改白王喬以之遐修
胡捐潔以懷沙兮終迺沈此離憂也

乙丑邸中作追錄於此

京師大理之堂是名祥鵲左評事葉君侯賦君侯曰
吾初計吏人京當遷謀諸神識鵲焉騰焉肱焉莫知
其適已拜寺觀堂而肝怵悟仕進之有數悲鑽營之
無術爰抽斯賦以示陳子陳子既暇乃廣其旨

厥臯馳於南海兮，蹠帝鄉以爲衢。眇駢司於維喬兮，瑯實豐其罔如表。醴粉之純襲兮，貞雜佩之琪琚。彭有燮

以青騰兮行十九而虛除甬雙鳳之摩詰兮翼正陽之
闢闢肆漢舞之逸倫兮恒壽宮斯焉安之靈風馬其翼
來兮視夢寐其若之曾夢睡之猶持兮景瞳瞳而沕厲
鏗飛籤若諧兮曰飛駁戾之於欄際胡穀音之刊兮孰
偵時之攸飲懌斯陽爲尾革兮偶君子先幾而哲寧卑
枝以辟患兮背梁牖乎太歲誕金篆於圓石兮虛說結
於元衣展予躬之薄愬兮于行邁又何期優東方生如
可指兮詣子信以芒推執兩端而溫故兮又符節於日
支蓋位置之參差兮詎高明之是究疏朝鳳而不式兮

矯棲鳥而難又剛柔固若匪應兮變孤父於噬嗑憐人
地與勵平兮閭逃織而却襍夷除軒倘幾失兮卓斯號
之故也穀音戾矣何年兮先後聰之是寫也緬嶠奏亦
已調兮宅理幹以召和彼顏唐之決釁兮可圖空而袞
加微其事而興義兮祕我祖之金科庸于黃之體要兮
寢張趙之浚苛稟金司於大序兮行無事而鮮差勵矩
度其洵儉兮百嬛巧又奚騁攬修嫫旣無點兮還夫君
而退靜鸚鵡族以能言兮蒼隼搏而多猛緝蚩蚩其誰
何兮苟不還之爲幸吾與我第容夷兮敢佞故而陰兮

試吾策於周趙兮揆夸父以何心陟羊腸而踟蹰兮諒
纖離之難任範馳驅將獲一分縱失鵠而猶求身三迴
翔而休居兮蹇又思夫德鄰聞直道於展言兮曰有命
之孔箴物旦旦其誰適恃兮天地轂其枯苑夫豈不辨
歲之不與兮苟河清亦奚晚稽首載以勿諄兮恣陰陽
之所遣雪吾思於坱軋之覆兮悲雄鐔之鏑於周箱版
墳素以爲城兮衽仁義以爲房襜避喧之友氏兮引徽
謳而相羊謳曰緩飲喙兮相厥方北斗高兮定星光偕
子行兮我心揚胡荆榛兮慨道長乃賡曰巢海曲兮不

可思匪建章兮遲光輝飽朱儒兮本樂饑康志齊矚兮
日月何其便卒歲兮與同衣

陳文忠公遺集卷之二

陳文忠公遺集卷之二

明南海陳子壯集生著

練要堂集

詩

黃鵠篇

黃鵠浴其羽矯絕凌青蒼黃鵠志四海飛飛歸故鄉故鄉得相見四海徒相望燕識主人心胡爲戀屋梁精衛思填海空水日已揚金石有變遷滄桑豈足量不見蜉蝣子楚楚明衣裳惡木非我陰覆車非我糧閔彼事區

區引繳欲奚傷

初歸飲順虎家兄東臯別業

美兄池館敞東郊
話我桑麻出野庖
山水經營始寧墅
畫圖二十孟城坳
鳴琴况愜邱中賞
語燕真移海上巢
大好歸來同藝藿
差憐棲息學誅茅

其二

桃李春風忽滿園
高樓更見棣華繁
賡詩晚就啼鶯塢
習射晴臨走馬原
滿目雲山多漢壘
百年天地有青門
看君日發蛇龍蟄
蚯蚓惟知一壑尊

東臯九龍井

九龍胡去來一雨洗靈穴其上蓮花界璽璫印潮月咒
鉢理則然卓錫神應設聖液泌清涼元珠時出沒跌石
證水經癭飲暢禪悅果行惟蒙泉受福須井渫各以聰
明因茲爲上善說

酌徐木之濠想亭

折簡應時鄰卽催角巾隨意客能來宅邊深貯一池月
物外重溫永夜杯常恐佳期妨杜若休憐生計任蒿萊
從容却笑濠梁侶東海投竿日幾迴

黃逢永過訪同賦

歸田今日遂平子學圃由來分小人半畝花開不改色
三城客散幾經春懷湘却厭騷音盛反魯胡憂雅道淪
蔣徑實尋羊仲舊翟門虛擬雀羅新

東臯和歐嘉可

春園幾度惜芳菲幾度美人春望微此地舞雩初試袷
空山薜荔且同衣勞將鶯谷殷勤喚故伴鵲原自在飛
行路十年今始信聲聲啼鳥不如歸

過黎介父嘉樹堂

謝家賓從幾追歡池館重來改築寬坐有高樓臨睥睨
不知遙岫入闌干錦鱗翠羽依人在時竹新花耐晚看
回首瑤琴虛自碎底須寥落向君彈

張二無督學數造敝廬余方屏跡虛其盛意賦詩
謝之

藥洲春水碧粼粼栗里尤承絳幄親盛有詩書傳魯族
漫將雞犬說秦人冥鴻白顧驚弦後凡鳥何當命駕頻
自古西河有干木肯容疎放學高真

禊日倣蘭亭體二首

春服既成少長乃攜遨遊天地萬物一齊義皇不逃觴
詠于斯仁智高深樂爾忘歸

芳渚錯新藻惠風睦清謳汎茲波間羽兩兩儵鱗游形
神既相屬耳目固難留悅理自一朝安復滯纖憂

何凝生投詩戲用屠緯真體贈之

明月曾傳碧海簫所思終未報瓊瑤君家夾鼓相逢易
公子西園結客遙勞向秋風歌桂樹豈無春水送蘭橈
景陽錦段江郎得催使鮫人夜織綃

祈雨行

升腓穗悞蒙荒陌斥鹵膏場盡寇坵農家停耜日如年
鬱軫隆蒸猶弗釋二儀曠廢失春和非時肆兀火旻多
難鞭蝮蝥勝氛祲錯教蒼蔚作滂沱盍將此意呼閭闔
璧牲虛薦竟如何三城夜夜輝星月南巷舞雩北里歌
吹笙伐鼓扮榆側可憐士女轉婆娑

其二

海濱父老臥田廬三風十雨我生初當春旱熯從來無
枉殺應龍南方居請向靈壇焚疋巫湯禱桑林禹陽旰
煩憂誰與廣川書居積貿遷非所圖夕殮元不計朝餽

附二
百錢斗粟莫支吾
因而嘯聚豈盡屠
不見去年艚羅一
無倚槍攘招呼
不可止巡按焦頭
太守匿若輩無知
亦棄市

過黃子有作

庭花方灼灼
堦鳥復翩翩
本擬旱雲賦
翻酬明月篇
一經寧尙白
對客况思元
莫問齊名事
新詩與世傳

雨中柬黃子

零歌君嬾和
佳雨亦徐來
太守亭邊喜
杜陵詩裏催
樓花潤色點
江鳥亂空迴
勇讀知流麥
予耕露足哉

過酌公遜夜得霖雨喜而有作

近市一重扉觴飛雨亦飛清
欄卽濠上驟瀑似山圍
始覺滂沱應虛疑稼穡非蒼天
放行樂攜手莫教稀

答歐子建

多年散木成勞薪每羨文園臥
病身龍泉太阿知我者
歷落欽崎可笑人宗國亦憂漆
室女高天乃弔湘纍臣
無端重下蒼生涕不願君王問
鬼神

與木之圍棋嘉可誦弇州和長慶詩僕亦和此二
章

棋枰不是人間世杯酒寧論身後名醉眼昏花君莫笑
臨場算道益分明

其二

長慶詩人掃古體并州前輩聚時名爭向枯棋三百道
沿邊趨郢作聰明

若上人新闢禪講偕黎黃傳諸君往觀酌智上人
方丈

宰官說法真無意靜者尋僧若有期白馬近傳支遁理
碧雲曾擬惠休詩泉深舊井疑龍伏香溢空林覺鳥移

也爲柴桑開酒禁宗雷相對莫攢眉

佛日與諸君泛舟江上俗是日已陳龍舟之戲謂
之出水龍

褰裳不及待芙蓉共聽潮音海寺鐘成佛吾甘靈運後
登仙誰躡李膺蹤鷗波直信浮天鷁鼙鼓俄能起壑龍
何事鑑湖私一曲悅君隨喜權歌逢

邀莊景說修撰酌東臬同作

背郭新疇一逕偏數聲黃鳥綠陰穿不嫌初服牽宮錦
共操南音入野絃菡萏月明山雨後琅玕風細燭花前

欲知雞黍田家約卽是星槎海上仙

莊景說奉使靖江王邸往來五羊見訪賦此贈別
禁苑春光渺後塵采風何地不咨詢千年銅柱開藩邸
一日金鑾捧命臣賦比淮南山八桂占當星漢月重輪
飛旌五兩頻來往父老相望越水濱

其二

物色青門自一邱齊名不敢望龍頭金裝本異陸郎節
繡被還同王子舟日出珊瑚輸海市風薰翡翠點江樓
山靈作意邀清盼黃絹新詞媿莫酬

景諒舟中酬贈丁山人

閩粵山川未阻修重來已是十年流
魚梁獨許莊生樂槎影真隨漢使
浮丹檢玉函時引目靈巖石室幾尋
幽鷓鴣已自忘機侶不信難畱海上
鷗

區啟圖兄弟邀同謝起東黃元卿酌雲筏

得歸白社倦扶筇開筵難辭野鹿蹤
謝客風期深攬結鄰家文酒盛過從
池光隱映雙趺塔花氣依微片石峰
副墨新藏知在此窗松砌竹已成龍

送孫青岩歸寧波

附二思公遺集卷之二
七
鄉心一夜渺難揮
明月刀頭興欲飛
北闕猶須長策入
南天不是倦遊歸

其二

結伴越江江可憐
荔枝齊擲孝廉船
儂家不省將離曲
尙欲畱歡歌采蓮

其三

嘈嘈絲管趁遊程
不及興公擲地聲
可但熟騷作名士
澧蘭沅芷一江情

其四

絳帳誰能學鯉趨康成又見領門徒不知禮樂東歸後

文采還教作鳳雛

孫家君門人延來舍弟受業

其五

最愛風流賀季真酒中遂識謫仙人當年乞得歸來地
十畝湖光儘不貧

爲黎瑞生題其先世畫龍

蜿蜒霖霧裏鱗甲轉分明柱下真人氣雲間小陸名書
堂吟片玉

用開建莫宣卿事

劍匣口雙精自是荀家物誰能爲

點睛

文止弟出市買磬詩以雅之

選石不能聲玲瓏對窗牖欲清俗客談還覓泗濱友

其二

弟也習音樂一室自鳴球五月候夷則黃鐘律應不

晨起見逢永題壁而去追和一首

三間紅日足半畝綠陰閒不是臥龍處空勞題鳳還雲
山詩裏態歲月酒中顏仍枕磯邊石飛花晝掩關

夜過嘉可和何公子

五陵裘馬氣夜夜擁佳人白社吟詩過青雲結客真還

添今雨夢遙憶舊花茵勝事仙湖得勞君爲買鄰

何凝生過訪索贈

閉戶先生嬾病真翩翩弱冠報伊人不妨清磬山公後
况有詩才水部新左轡夷門常自下小兒德祖更誰倫
卜居亦就柴桑里每愛琴尊狎隱淪

壽馮大姑詩

王母過八十而姑六十強共以迎春酒茲爲獻壽觴姑
來壽王母綵服諸父行入門各自媚有如三鳳凰挾有
八九雛於姑亦稱王王母領姑喜歲月暗記量若也初

生辰茲辰正相望一粲受孫子爲姑合酬將歲歲春風
吹爲姑開北堂北堂姑自開承歡均未央

瀛洲丈人七十舉子李伯襄宗伯黃逢永孝廉其
壻也徵詩爲壽

丈人行樂鑑江邊真境瀛洲遂盛傳聞道麒麟天上瑞
不知七十地行仙一星南極輝珠蚌連壁東牀引玉田
寧似世人婚嫁累移家遊嶽定何年

詠塵 四首和黃士明少宰

支離滿天地點點度輪蹄埃火傳邊近煙花障陌低陸

生衣本素楚客志須泥滄海飛揚甚無嗟浩劫迷

詠柳絮

望去千絲碧飛來萬玉明高低非一態蜂蝶不相驚乍
擬紛紛雪寧爲泛泛萍隋堤三月莫沾惹舞衣輕

詠草

蒙茸多露處生意幾鮮新晞日不遺汝春風偏趁人王
孫歸興切遊女踏歌頻攬結青袍色畱連芳樹津

詠荇

芳池碧澗同密藻細蒲通深淺皆宜水參差早入風鏡

光容展葉帶弱不勝藜下體如堪采連錢冒漢宮

漢宮太乙

池有連

錢符

短調歌

畱歡始記儂儂小識歡面攀花有故條幸及經時豔

其二

蓮花莫懊儂儂有真顏色十五始學歌十六爲郎得

惆悵詞

秋河黯淡月光斜蠟燭分明淚絳紗深樹無媒引鸚鵡
錯拋紅豆入他家

題綠珠祠

梧州

逝水徒傳金谷園，荒山誰識綠蘿村。
生辭故井難銷豔，命薄高樓敢負恩。
燕子頻來多戀主，杜鵑啼斷爲招魂。
憑君一和懊儂曲，自有人將孤笛翻。

送雷以亮同謝元戎遊星巖

煙蘿羽翮寄滄洲，屢褐相逢劍氣浮。
玉帳談棋新揖客，樓船下瀨幾防秋。
因陪紺閣空中嘯，還覓丹梯世外遊。
況值好文多雅唱，天教石室有鐫留。

初秋同何龍友黎君選馬伯起金相如雅集嘉顯

堂卽席賦

共憐秋氣迴颯雨薦新涼逸興池邊墨清言竹下觴棲
鳥明漢影子鶴叶庭霜韋杜尋常會琴尊遂一堂

秋夜卽事戲贈何龍友

天上秋臨玉鏡臺小星三五映前台明珠自古真無價
烏鵲今宵遂有媒錦瑟絃中呈雅調流黃機上試新裁
阮郎旣識仙源路桃葉桃根信往來

送謝簡之元戎歸越

仗劍天南貫斗墟坐銷氛靄見樵漁交情不厭生芻蕘

世路從知薏苡虛嗜癖偶塵書記上廢吟重憶嘯歌餘
苧蘿山下東歸客試訪鳴夷一舸如

送謝生式臣元戎之子也謁予門下

美箭東南豈盡收棄繻英妙更無儔庭階曾識將軍樹
湖海還驚謝眺樓好向門生吹笛和多慙父客執經遊
長楊亦是誇胡技鳴鏑雙鵬看阿侯

送龔培赤隨謝簡之越遊

魚鳥情親自竹林江湖不負遠遊心軍中阮瑀多優渥
門下袁郎獨賞音藿食定知彈鋏易布裘端及授衣深

分明一棹剡溪曲畫裏名山儘意尋

智上人黎君選陶搖光歐嘉可載酒索書分賦得

萍字

高僧處士宜相訪文雅淹畱載酒亭濡頭著墨惟倚醉
青眼看君難獨醒自喜客添尊滿滿不愁月薄煙冥冥
竹溪逸友足吾志池上風多任打萍

歐陽伯曦釋逮初歸偕諸子枉過有述

菱荷容易間初衣鳥鵲何緣啟夕扉明月恰隨公子蓋
小園同偃丈人機詩名拓落滄江穩秋色崢嶸白露稀

盛世漫勞歌鳳德卽今解網放鴻飛

雷生行

雷生託跡皆仙術丹山藥鼎伴棋局縱橫不算世人機
檢拾遊囊解醫國扁舟海上飛來再絕藝逢人誰不愛
癯形知有辟穀方妙思只合橘中對秋月春花滿傲廬
消閒却病足清虛淹畱自是恣真賞肯向王門學曳裾
鵲鵲風急鴈聲微還山催發桂花期木榻遙須暫相待
芒屨無恙更何之

陳文忠公遺集卷之二

陳文忠公遺集卷之三

明南海陳子壯集生著

練要堂集

詩

答區啓圖閒居見存之作

將無蕭瑟托閒居
剩有談諧禁廬世
事澁如千口酒
男兒何必五車書
清齋藥臼新調鶴
散髮荷衣舊釣魚
不是美人相憶句
音塵容易到堦除

送雷生

客子僑居就隱淪
閒園魚鳥轉相親
交遊名下推供聖
來往山中採藥人
杖有百錢免羞澀
酒非千日對清真
登高臨水多秋興
楓葉蘆花是去津

王克仲孝廉佳詩見存用韻却寄

晨星遙望歎朋簪
永夜曾陪玉麈談
爲問千金市燕駿
何如匹練走吳驂
張憑勃窣才還健
言子精華筆更酣
莫訝新篇不成和
故人蕭瑟賦江南

送魏道安復遊桂林

江城一臥歲將寒
空谷跼然罄所歡
看竹自攜醒酒石

談棋相映切雲冠
高吟八樹清秋蕊
輕棹分流夜月灘
何處不逢賢地主
經遊寧畏客行難

生日偈答石傭子

瑤室璇房就裏披
黃花九白對佳期
生身合掌如來日
世上齊肩大小兒

對菊絕句

爲園蔓棘固須裁
霎眼新花亦可哀
爛漫寒蓂將一月
殘英猶自照深杯

其二

陽明先生遺集卷之三
菊花須飲過重陽待過重陽菊更芳家在甘潭人不識
年年生日酒中嘗

其三

浮名三十脫烏紗雙鬢生成合插花春去秋來渾未改
終知輸爾傲霜華

其四

寧有遊心逐少年名都花草鬪芳妍銅街馬上塵隨眼
大好看花興悄然

其五

歸來草色破霜痕
花落苔深自掃門
獨有秋光不相負
繁英依舊遶籬根

其六

淺白深黃次第成
釀來新秬甕邊清
陶家豈有江潭怨
恐負花情與酒情

其七

翱翔華苑絕芳塵
公子能移數本新
涼月醉吟秋色裏
難隨白露寄伊人

其八

聳壑凌雲百丈清登臺爲爾首重搔尊常莫漫欺籬落
佳色分明絕世高

其九

采菊遙憐種菊時心情惟遣橐駝知貴花賤葉非吾意
野蝶閒蜂任汝嬉

其十

曾入名園更可憐籬花矜護害天然蕭騷好自舒情性
萬朶千枝亞野煙

送帥從龍邑丞擢判睢州丞先膳部公獻平西夏

頌於神廟得旨錄送史館

混跡風流地
清心政事堂
仙才多薄宦
家學自名郎
副墨邀浮嶠
張琴答桂陽
南中行畧遍
高步信遊梁

其二

先朝傳獻頌
今日喜聞詩
陶謝無兼體
鄒枚又一時
園添新雪色
人有暮雲思
殘廢龍門業
勞君枉見推

丞嘗進子

修宋史

贈陳彥質歸閩

莆中有佳客
能作太邱聲
永夜隋珠色
終年任釣情
貴

遊多父執知已足生平珍重題紈扇秋風蘭芷清

夢惺山

有序

若惺過予談惺山示寂髣髴在胸夜夢至一蘭若而
惺在焉問予墨蹟孰佳予曰學道人又多乎哉於墨
蹟何有惺變色曰然則某諸刻將無爲公覆瓿乎曰
安敢爾也我輩文字如蜂采蜜百花俱湊豈獨遺公
是故入世不肯漏出世之塵出世則安取入世之塵
哉惺雖不甚點首而其鋒頗塞因存其語以證將來
綺語名場事已闌夢遊文字我曾看請君細飲曹谿水

割蜜還花也不難
愁刻有夢遊集

北望臺月夜獨眺

雖非巖谷裏孤嘯亦孫登
月月晴無滅光光景欲層元
珠如可得黃鶴會須乘五嶽
真拳石齊州安足稱

古意

根株無賴却因誰
薄命生來怯兔絲
情知孔雀分飛後
塚上孤鸞自一枝

送何龍友太史還朝十首

風雲如此際
畱滯是何年
總爲君親合
非關出處懸
有

附錄卷之三
書歸使節迴夢聽朝鞭恆說中興事公才善勉旃

其二

深序追前輩通才漸老成聖朝徵實錄之子匪虛名
賀世羅浮鳳懷人太液驚東南冠冕地行矣煥弓旌

其三

皇極巍三殿詞頭隻一家露莖新寵遇雲笈舊聲華
歲月宮僚缺聰明講幄加開元金鑑在風度總宣麻

其四

同棲南海曲並入承明廬東壁勞相照他山自不如
祖

劉憂國蚤房杜論交餘爲謝鶴鸞侶南枝已卜居

其五

人瞻謝傅曰吾愛郗家風紀有三芝異出非小草同諸
王曾擁篲餘子競雕蟲里婦曠何態長門亦漢宮

其六

已失楊朱路那堪問水程蠡湖陽鳥沒嚴瀨客星明是
處江南草春風濟北生思君日舟楫不獨放遊情

其七

欖水臨將發風流得雅裁美人明月夢仙吏白雲臺海

鶴招琴曲江鷗勸酒杯濯纓清可聽不覺榜歌催

其八

經旬維纜意歲色引離觴若爲尤風緩從添至日長梅
花詩裏臘黍谷律中陽雲樹熒熒晚何能望帝鄉

其九

漸覺山爲黛新開鏡是潭條風當少女芳草卽宜男玉
切朝天佩香分侍殿簪東方霑社醉歸袖幾餘甘

其十

何人招隱賦復作北山愁祖道椰榆笑仙槎汗漫遊真

看天馬逸本自歲星儔縱有羅浮夢應隨到十洲

送黎君選同龍友北上

青翰同舟發釣磯江梅殘臘雪花稀夷猶似待春潮送
嶺上朝朝朔雁飛

其二

二豪酒德並堪論花月春江笑問津共醉萬重山色裏
不知誰是客中身

其三

一經攜謁聖明初東閣還開舊祕書諸父聲華滿霄漢

故人文似定吹噓

其四

莫小蓬弧射五雲百年麋鹿豈堪羣
長安大有同遊興無那花時獨憶君

前池雁篇

有引

黃子得雁養陳子池中毛羽成
颺去童子捕還落其羽陳子曰雁之既毛羽也使颺去不然胡養爲客曰
雁以侶爲歸彼無侶無歸去將何之與其墮於不可知之手毋寧寄食君池中若爲雁計未失也作詩貽

黃子

高樓曾爾叫聲過瘴海無能避網羅
自分不鳴同野鶩還將短翮顧清波
此意與君深愛惜稻梁豈爲私恩澤
唼喋原非解向人棲身似覺曲池窄
佇子書就送將歸直度衡陽抵碣石
可憐羽翼等閒催可憐亦少長風借
中宵那復歎離羣異方拌作不歸客
悠悠天路向何之誤入他家更苦悲
世間刀鼎非無用不記當初魚網罹
一聲長叫振枯槁多謝客來言亦好
難隨放鶴去凌霄得與遊魚聊戲藻
風草淒清煙月深欲寐不寐起沈吟

吁嗟爲爾起沈吟空折江天萬里心

同諸君分賦梅花

疎澹合孤棲高人自品題乍看臺影渺畱伴月痕低絕
嶺尋常見前村咫尺迷亭亭不解語何物更成蹊

和逢永水松

水松出南海似檜而香抱木旁生柔韌可作履謂之
抱香履土人不甚重此木亦不甚香嶺北人愛之其
香乃殊勝云

此物宜鄉國寒泉不待盟蟠生卽澗底天籟信濤聲風

兩龍鱗見陰森魚甲明抱香知可愛豈是衆人情

爲蔡醫壽母

衣冠通德里機杼孟家鄰山種千年藥門盈四葉春
青囊負米意綵縷舞衣辰爲報麻姑信雲輶卽主人

送李伯開歸秦和兼諭其尊人自得在楚

倒屣逢王粲稱詩似法曹幾何辭白髮虛此問綈袍短
策從孤往清琴莫浪操知君江路熟還望楚雲高

送黃君常遊武夷兼寄胡甌寧

羅浮何日返行輶宿黃精天入建雲密春開閩靄清宓

琴山水曲嵇駕弟兄情若問鄉人宴應知重客名

立春日贈張玉筍邑侯

輕舟曾與玉臆迎還隱桑麻海上城仙觀雨時隣穗起
石門風過憶泉清微同草色先吹律又借棠陰一聽鶯
莫訝閉門虛折柳春光渾似踏歌行

春三日侍諸父泛舟桃花塢

三十春光曉望初仙城誰問武陵漁孤村潮上堪移舸
萬樹溪深擬結廬醉色宜沾紅雨亂勝情真與錦茵舒
得隨杖屨須行樂回首元都事總虛

其二

欲作郊西卽灤西紅芳十里勝金堤不知南漢千年苑
更入劉郎第幾溪負局客來憐犬吠和歌誰伴乳鶯啼
清時羣從多遊好豈是秦人世外迷

登赤石岡塔

石壁新瞻九級尊飛甍危拱散層軒琶洲鈴鐸江聲戰
越井樓臺海氣吞萬里戈船歸漢譯諸天寶地稱祇園
御風直揖三山外漫倚浮雲望帝關

黎縝之除夕六十初度與智上人同庚比同枉過

盛足文章與後賢
恰餘歲月卽初筵
吟邊海日生殘夜
杖底椒花媚遠天
雙眼常逢巢父飲
三生同證沃洲禪
新年詩興清新甚
肯把屠蘇讓少年

玉蘭

清露初擎出曉窗
孤生明潤世無雙
十年花下多憐汝
相接瑤枝到海邦

燈夕赴洪紫雲郡守園亭之招

三城已奏三春樂
五夜還追五馬歡
徐榻久懸高誼在
習池真許醉遊看
林間燕雀千聲入
燈下魚龍萬舞攢

公暇更多求瘼意野談容易使君歡

沈豐城母六表其姪來粵索詩

女籍遙占不老身南陔欣寄采蘭人定移花縣金桃熟
得傷萱闈玉樹新龍氣由來看斗極翟珈初度見星辰
吳興門地安東似七箸從容語伯仁

三水蔣令公聘黃逢永爲諸生授業詩美其事

祕帳攤書久閉門傾筐何意托蘭蓀生平羽行堪信
今日文侯禮獨尊自愛腹便惟一榻共知口吃有千言
琴堂喜近談經館鬱水衣冠氣色屯

送黃子應蔣三水聘

春江潮汐信搖動美人杯
一雨蘆苞水孤煙玉鏡臺
書逢關尹著船報孝廉來
自識遊燕路高歌首漫回

答曾霖寰民部白下見寄

馬足經時失今看骨轉高
氣清郎署月聲起大江濤
誰共青綾被猶分金錯刀
途窮知阮慟效拙見潘毛
龍蠖惟公等乾坤聽此曹
餘生湘帛屈處士晉稱陶
雞肋憐朱紱蛾眉妒錦袍
千夫元諾諾羣口但囂囂
來往愁譏鳳攀援恥學猿
邱中多細響天末切刁騷

寄贈溫侍御溫前今按蜀楚有聲特申巨濟之望

云

華髮勳名多角冠驅馳驄馬慰加餐
兵戈况復誅求盡楚甸何如蜀道難
喬木始聞遊女詠銅鞮多稱里兒歡
當筵合罷南征曲都人昇平樂事看

讀張孟奇西園諸草酬贈一律

文隱青山幾度梅溪邊明月笑徘徊
閒情北雅佳人曲高會西園上客才
焚草尙堪餘滿乘啜醪元不廢干杯
何緣仙夢嫺環祕眞見靈光賦裏裁

春日同張孟奇太守王幼度明府連集東皋

江上行吟名已埋花時別墅景差佳追趨五馬雙鳬會
教放三春兩日懷魚爲親人添水檻鶴能報客掃山齋
丁丁又聽樵聲晚畱醉知君心賞諧

東皋次張孟奇韻兼訂羅浮之約

誰遣春光到野萊遶園花竹盡成栽煙疎北垞啼鳩緩
人並高陽騎馬來望海樓臺真自幻談天風雨若爲開
相期最是羅浮夢見日應須三萬迴

種枕榔以一株分黃士明少宰園中輒惠佳韻敬

答

物色桃榔小山樵惜故根生成種吾土風雨託鄰園
蔭薄思年紀憐深到日昏榆枋亦何意堪與棟梁論

其二

綠野娛清尙奇葩不用饒青春閒種樹天籟已聞韶
幸可存微植多因賞勁條孤根隨地穩百丈任風搖

後池雁篇

有引

過黎子問畜雁得香山何子書馴乎其來又一雁也
捧歸聞其聲若相語者吾聞雁無亂羣焉雖語豈其

意哉然固勝於無語復作池雁一篇綴以前後

三五同人簇席歡鳴鳩語燕對花闌門前忽入清秋思
香山太史筒方至上林苑裏報蘇卿元武陂中遇曹植
去歲黃生得此禽能使吾園秋氣深紛員無數頻來往
但從天上遺之音引項停眸呼不得夜夜爲傳三疊琴
滿堂笑我情如此恰好來禽堪付子曲池比目與鴛鴦
會見雙禽曲池裏攜歸我則解其聲前禽未訴後禽鳴
曰江南北全繪繖羌余獨也羈魂驚兄弟妻孥誰復有
吞聲笑遞他人手兩口曾三易主人纔執一編行者某

看爾悠悠若將終似子鬱鬱恐難久後禽款款具前陳
撩亂前禽語不真直須與爾聊相依其那食粟翼重不
能飛

陳文忠公遺集卷之三

陳文忠公遺集卷之四

明南海陳子壯集生著

練要堂集

詩題日薄遊草附閨詞

陸景鄴先生觀察而來也壯以弟子之役買舟迎諸
江滸上已美風日黃子逢永亦有三水之行因與弄
潮而上至三水聞觀察先生臨省尙遙欲返舟何子
龍友偕黎子君選北上舟適至飲劇訂遊峽山子興
猶遲遲也蔣邑侯從臾子借舟繼飲食何子書數至

艤舟十日不得陳子遂遊峽山此山幽深繚繞支衡
而折嶺自可當一遊者乃或往或來初不自意上下
湛澹三百里中鷗鳥身世雲煙蹤跡大都然矣若云
寇盜不警蝦菜從容張子同陸魯望之後則我爲政
今茲未能何日忘之故此遊匪專峽也薄乎云爾連
日得詩若干

上巳同逢永發珠江

三江爲令客萬里趁舟行禊祓尋常會夷猶山水情木
棉分岸照藤枕共吟清寧有一杯酒風流感慨并

望石門次逢永見懷之作

扁舟移信宿風雨石門隄流水春城曲荒煙碧樹齊無
禽棲舊井吹笛過前溪指顧江山外重來得句題

三水候陸觀察座師

蠻水滔滔轉戰餘主恩遙借外臺居十年誰問康成業
四野人瞻孟博車乍覺鵬風驅海蜃相將蜑雨足江魚
漢庭此日推文武不數重來諭尉書

邂逅何龍友偕黎君選角中分賦

鄉國遲回水石春諸峯隨意碧嶙峋三江煙雨人方至

上巳風流各可陳
舟楫長年須進峽
行藏今日定知津
最憐南浦蘼蕪綠
迸入提壺酒色新

江行見暴骨五具詩以埋之

正子空江枕石宜
桃花春水太相欺
迴環試聽莊生語
還爾千秋萬歲期

將爲峽山之遊賦謝蔣三水

點點雲山發興過
生涯因寄木蘭多
春圍潏灩花開縣
榜入滄浪客放歌
日午輕陰分雉翳
雨餘清夢散漁蓑
不愁禹峽終難進
胥水從添百丈波

舟中呈黃子

半生煙水夢今日細須論垂釣餌何設看雲意自存鳥
聲高竹店人影暗花源遂欲攜家口躬耕佐鹿門

讀陸觀察座師黔行錄述而成韻

西南毛寸枯悠悠事空郭賊穴失中丞束手萬夫落江
州銳莫當行整監軍託徑道不涉閭橫身當百作清戎
炯列眉轉運若行脚親麾蔣義戰倉卒起懦弱驅馳空
賊衆首功多刺斫飲馬三岔河漢壁凌山岳馘苗青宅
溪四顧揮鉞鏖竟以十旬心黔楚皆參錯霧雨先雞興

記牘沈宵析葛君治蜀計馬援平蠻畧兼之反掌餘嘯
歌青油幕上下有藩城旣生曳亡魄可憐鬼國中沙蟲
與援鶴風影憤憑人肉食轉相攫反覆亦多端餘生盈
其壑睥睨日月光紛紜算功爵國手奈獬兒涇渭欲同
濁公去互蒼茫公畱何束縛古來安危身豈以資庸惡
幽谷鳴好音天地翱翔若卽看瘴靄消差覺蠻煙薄稽
首順下風拊髀還雀躍念伊失舟人淹流靡崖泊虛致
狂夫言實忌瞑眩藥

舟溯胥江聞何太史遲子峽山

馬君非不好短棹信遲遲一報佳人待如聞靈管吹參
差諸翠合輕駛並雲移莫以此時興方子遠道思

其二

春山非一邱春水豈同流不謂臨歧別翻成選勝遊寄
將黃翠雨泛此白沙鷗雲鵠還相見飛來最上頭

黃翠岩名

白沙村名

胥江天妃廟邊竹

草色江聲轉廟門蕭蕭若箇不清魂分明玉鏡臺邊水
不著黃陵半點痕

胥江曲

削竹青青作挽長竹條雖小挽須強峽口灘高耶斷挽
胥口灘溪儂斷腸

其二

三水西南舟已遲不知郎去定迴歧聲聲山鷗行不得
日日江頭歌竹枝

遲何黎周一日至峽夜集涵碧堂

昨雨何如今雨深峽舟相繫果追尋難辜我輩登臨地
不盡空門去住心欄際流雲千石走階前崩瀑數鐘侵

山靈故爲酬高會大放蒼龍夜半吟

禺陽雜詩

福庭幽不測樹杪露香臺纜阻天爲劈江衝景屢迴龍
巖新雨漲鳥道亂雲堆掃石將魂冷驚濤濺面來

其二

幾灣靈鷲繞無數妙峰攢上界成龍象寥天寄鵲鷺觀
身達磨石御氣葛仙壇欲見軒轅世山中自不難

其三

逢僧時歇坐聽鳥復閒行林變陰陽道泉移遠近聲洞

崖蒼鼠竄棧閣翠翹明何日經遊跡漫勞刻姓名

其四

蒼崖穿古寺磴澀夜遊稀南斗連衡近三山隔海飛猿
姬羣月嘯松叟立風揮須有羅浮日中宵達翠微

峽夜別何黎二子

去歲已有行色
子亦稱詩送矣

乘興卽相送迴舟是別離始知殘夜酒不似隔年詩
影沈山月篙聲亂鳥枝那能畱二子吾亦放吾之

雞鳴歌

明星北斗雞聲訛山高水深橫石多東方欲明遠婆娑

欸乃開船奈若何
看頭把柁識來路
勝待尤風不得渡
移竹

昨夜峯頭弄阮俞
海天鸞嘯未曾孤
一竿亦是球琳選
風雨山房聽有無

其二

高節尋常手自分
平安何日嫋秋雲
風流最是山王別
幾箇林中伴此君

樹中草

春風吹野岸芳樹
一何翳仰首引柔
條知非正根蒂加

意芘其根幸勿相憔悴陵谷或未知餘生猶當繼

三水與逢永小別

共有懷仙引相爲滄海吟流連風雨色不滯水雲心
丹實朝餐易靈文夜火深因之生羽翰來往玉峯陰

晚泊

裊裊度芳洲行行復殘戍青春雲日酣已臥西巖樹身
愧波心鳥放曠亦多慮人生疇靡適盜賊駭聞故掠餉
兵使船輕將身角侮今我囊中淨要贖非所慕奈觸此
惡氛遂短江湖趣安得仗廓清籬竹溪村住隨力買漁

初因風自來去靈山及佳人遭會日應數

閨詞四十首

有引

客吟閨中詩大都值秋風之搖落感歸妹之愆期無
聊矜其冶容熱中流乎冷韻故不及親卿悞儂之情
擣衣織錦之事陳子感其辭慨然和之乃其事多不
雅情屬太露甚有蕩跌爲青樓者爲裁其體命曰閨
詞以附閒情賦之末云

澹粧

墮馬新粧碧玉簪穠華未便稱幽襟尋常梳掠無人見

獨自盈盈出鏡心

畫眉

新上菱花一抹文
遠山斜月澹於雲
商量時樣兼宮樣
還比張家勝幾分

點脣

百福雕匳倚再三
醅醖滴露滲朝酣
絳脣不用多粧點
二月朱櫻已半含

理衣

黃匣朝開蕙麝清
不寒休訝六銖輕
銀泥錦縠何方物

秋水微颺自織成

微步

綸襖羅滕子細裁金鈴不響茜裙開微塵只向波心覓
枉費陳王八斗才

挑燈

十二雲屏月照殘無端量得帶圍寬挑燈不語停針線
差遣蟲聲答夜闌

護燈花

珠箔斜明拂夜風琉璃疊扇掩朦朧小鬟未必知人意

欲翦銀缸一朵紅

晏起

宛轉嬌慵若不支
從教侍女候羅幃
半窗紅日半牀夢
巧鳥催人唱畫眉

摘花

履綦初試印青苔
綠彈紅殷錦繡堆
卻訝雙鬟纔整就
等閒帶得一蜂回

惜花

不覺花朝過踏青
惜深爭似護花鈴
鎖窗無那飄紅雨

拾得堦前數片零

吸花露

姑射冰肌綽約如木蘭朝墜引涼初
不須殿柱擎金掌
自勝宮妃嚙玉魚

調鸚鵡

鸚鵡移來守繡房
慧多長倩教多方
櫻桃樹底催簾下
喚有人來李十郎

用霍小玉事

打鴛鴦

鴛鴦繡罷出池邊
三十六雙明睡蓮
蓮子試將隨意擲

一雙驚起不成眠

趁燕

何物重來伴侶偕
漢宮粧束翦人懷
瓊鉤盡搭隨風入
好住雕梁認玉釵

鞦韆

寒食佳辰晴可憐
花鬆玉軟爲鞦韆
飄飄翠袖雙飛去
不覺空中墮寶鈿

鬪草

女兒三五漾春風
蠲忿忘憂入裊中
誰唱青溪小姑曲

辜芳未過合歡蒙

拾翠

桃李津頭別有情
笑將遺翠問同行
依稀阿姊先歸去
芳草茸間落一聲

解連環

阿姊能辜楊柳枝
同心爲帶結絲絲
生來獨有儂多智
閒解連環人不知

戲蝶

蝴蝶飛飛處處同
漫勞消息過牆東
輕衣薄粉拈來碎

花氣薰人恐夢中

藏鉤

並列芙蓉金井頭
蒙龍月下笑藏鉤
儂家不識生離事
贏得披拳中一籌

遲月

沈吟閨閣寫香奩
不盡幽懷問彩蟾
此夜更無人倚望
清光渾射水晶簾

焚香

深院鶯啼靜掩門
博山鑪火撥黃昏
金蟾齧鎖空何意

斜印梅梢片月痕

集古美人

女流才調稱相如彤管丹鉛日不疎
自是閨中無逸史
惠班徒讀漢庭書

裁詩

詠雪題梅唱竹枝無題亦自興
參差生成一幅松花紙
閒倚西窗綴小詩

臨帖

勻墨圓毫掃素時翩翩如鳥踏花枝
阿誰妙楷參鍾索

李衛夫人字茂漪

戲染

繡譜看來未可人
腕中花鳥意中春
低頭更卸金條脫
細縷煙煤繪一勻

寫影

幾回點筆恨難真
未寫先添柳葉顰
夜夜每憐燈下影
朝朝畱對卷中人

繡觀音

紅粉深知只剎那
思修無路證三摩
分明瓔珞金針現

一瓣蓮花度普陀

禮佛

□□香臺下界明
茗華未偶學修行
三時五體能投地
解脫娥眉懺此生

烹茶

□□並虛欄覆鼎
鑄羣姬相過鬪
茶槍雷鳴仙掌殷
勤試候火親聽二沸湯

凭欄

徙倚閒亭過夕曛
碧闌干映石榴裊
春深風雨渾難聽

惟愛芭蕉葉底聞

圍棋

賭勝欣然共適情日長無事倚楸枰
異香縹緲非人世
玉樹前頭落子聲

操琴

梧桐入戶淨琴張玉軫輕移已叶商
一曲還應神女聽
無人知道楚明光

新浴

曲屏深處澡蘭湯雲縠輕蒙白雪光
小立不教紈扇展

天風徐下觸明璫

薰鋪

缸花夜貼頂文圓
俏立牙牀斗帳邊
睡鴨香濃儂白看
春寒初換八蠶綿

晚粧

緩下搔頭髮餘香
絲膩滑懶堪梳
蜩蟬蛻後口鴉散
妙鬢雲高夜不舒

佩蘭

采采遊春意自殊
芳風長日襲流蘇
最憐楚澤多香草

嬋媛猶堪作女嬃

怯病

夢裏虛驚銷喚人起來幽對欲含暉
犀株銀液爲方藥
素管畫絃禳歲辰

倚樓

漠漠春雲簇絳紗
高樓凝望日初斜
玲瓏繡鞅香車路
知入垂楊第幾家

吹簫

金屋何緣貯阿嬌
美人家在雲霄迴
翔彩鳳休飛去

曉月誰翻碧玉簫

陳文忠公遺集卷之四

陳文忠公遺集卷之五

明南海陳子壯集生著

練要堂集

詩

海珠謁李忠簡公祠

宋道日南行番禺分緯象騰達菊坡門風徽宏器獎旣
植外除聲亦觸金華賞委身小朝廷乾坤就鹵莽諭賊
障鄉邦疏姦明直讜御榻引裾年氣與霜旻上清切九
閭靈南人信無黨賈董實縱橫真魏虛來往太乙西湖

觀誰與論羣枉舉手響陽堂端爲文溪榜海珠石一拳
潮瀾奔泱泱官津有送迎城堞橫舟槳節蒲與瓣香亦
可羞窺像荒陬子姓繁茅邑詹時饗俎豆固未夷聲施
亦未廣每口感遺編端居邑做惘寧知禮佛幢不見讀
書幌口陟科名間丰采乃千丈面裏出孤峯海天雲口
口以貽同遊客殷勤致所仰

夢彭山公雷伯鱗二年兄成十一韻

吹殘燕邸夢望斷定陵春六詔周金馬口口口玉人好
談天下事一睡世間塵數造休傳騎口口或借巾琴中

稱弟子書後擬精神善戲不爲虐口宵還及晨
焚龍高信步霄漢自由身連墮遺弓淚方知束帶
辭梁思侶燕縱壑失驚鱗於忽難爲寄崎嶇好自珍
只今山閣迴百憶恐非真

家圃與諸客竟日夜劇遊伯仲咸在賦二十二韻
青山誰獨往白日竟無譁誰有高人跡來尋處士家襟
懷都貯月骨相本餐霞松下幽盟在林中逸興餘觀魚
新水上策杖小橋斜棋局臨風置書牀就竹遮侵堦半
馬寫點戶碎桐葩欲種三眠柳纔分五色瓜灌園吾自

拙揮塵客偏嘉庾杲能供韭樵青解試茶飛觴流石齒
改席近簷牙單袷口初怯層臺矚轉遐螢窻猶伏蠹影
樹忽驚鴉春迫連宵暗星輝此夜華朋簪盍不偶酒德
頽還加得句同書葉工詩愧浣花社蓮心並照池草夢
誰誇孤賞琴三疊奇情賦八叉調調疑答賴閣閣任吹
蛙貪弄金鵝蘂從嘶白鼻騮無人行闌闔隨意步闌闔
重約明朝過催晨鼓易過

補沈休文憶詩二首

憶起時酣暈半不銷粧鏡直須倚鉛粉若爲調唯應憐

夜夜乃復有朝朝

其二

憶別時迴環語易畢
強將淚意收倍覺愁光溢
攜手立須臾屈指問何日

讀書寡出拈古韻
事作戲謔非詠史體也得五首
料得曹瞞兵氣驕
審音當日見方謠
風流一顧人人誤
只合清歌試小喬

其二

只借庭階玉一枝
弈棋未了破秦師
佩囊賭却無人贈

生怕東山再弈棋

其三

八詠樓前逸似雲
少年場裏爲輸君
終須減盡腰圍帶
始把分桃作懺文

其四

清賞沈吟殊未央
梅花端的爲誰芳
可知再到揚州日
不作帥雄夢幾場

其五

千古文人信有權
一言那肯博嬋娟
爲逃相路教歌舞

嚴續殷勤亦枉然

畫石

聞說參經座三生性不頑何人當拄笏翻擬對西山

畫蘭

谷風吹我襟起坐彈鳴琴難將公子意寫入美人心

五日珠江曲十首

乘潮爭向荔枝磯衫服明妝擁若飛游女游龍相出没
不知若箇弄珠輝

其二

金錢不惜買河刀慣抹黃頭慣學操
罨畫淨鋪吳練闊
招搖新掛越羅高

其三

幾隊黃輝與赤鱗爭標齊榜隘河津
五方游術偏能辨
不道絲繩五色新

其四

芭蕉紅蕾綻花瓶茉莉簪頭串素馨
少年奏板新歡唱
盡倒如泉弔獨醒

其五

嘒嘒新蟬至今遲攀他荔子最高枝
艤舟斜日絲能繫
又趁堤頭踏草嬉

其六

蹀躞參攪作態狂往來驚起野鴛鴦
馮夷欲掣羣龍舞
五月江波特地揚

其七

琵琶洲上載琵琶碧玉粧成自小家
樓船裏面籠珠翠
亦學鄰舟叫買花

其八

溪上參差石髮梳五時花薦盛芙蕖千年絲肉還誰主
莫問芳華廢苑初

其九

將府轅門帳亦開婆娑士女遍城隈長檣鐵鹿連番舶
花面嬌獐盡看來

其十

乍雨蘸裊休洗紅纔分蓮葉戲西東等閒一片巫山色
都在金塘玉漱中

詠白蓮十首

每軸風簾失醉顏素衣何日步人間分明一夜檻前立
不見房中舊玉環

其二

不愁濃膩占恩波虢國夫人馬上蛾無端太液池邊水
惹得閒情解語多

其三

平泉莊上芙蓉湖那處鴛鴦五色殊貪睡月明渾不省
綃宮偷_紅盤珠

其四

水月靈因一樣光暴心還願待秋陽

蜀中有朝日蓮那知皓皓

江潭畔十丈紅塵染客裳

其五

曲沼流風泛玉臺水晶盤遞藕絲來西池送到崑流種

實愛凌冬和雪開

西王母有崑流素蓮凌冬而茂

其六

華頂猶憐一朵青空山獨照涅槃經偶來淨社嫌心襍
折向芳池禮法瓶

其七

朱闌翠箔渺前身梨影梅魂認未真涼雨過時香亦洗
孤清難買水仙鄰

其八

遙暎吳門匹練長採菱歌罷試新粧雙纏不動低垂手
未覺西施醉玉牀

其九

暗粉斜香湛澹浮月華雙美木蘭舟同心卻笑相如婦
一臉啼痕寫白頭

其十

玲瓏日表午初移真見何郎拭汗時獨有銀光飛故粉

幽懷攤寫涉江詞

養紙須芙蓉
粉銀花紙名

張義姑詩

桂林有義姑寧不字以全其兄之孤君子謂其於張
也功矣

貞木非兔絲根抱不相離寧爲獨棲燕視此屋間兒豈
不念偕飛此兒不可攜婦道貴從人一去志願乖東家
嫂自由門內我當支將身代嫂守將心報父母生男幸
抱孫生女拌人婦蒼天不可知孫大經女手

得張孟奇山中書問却寄

□十春復秋浮湛朝復夕徒溪棲嶽懷羅浮望咫尺
想赴鐵橋超韻通瑤石此中有真侶時時遺履鳥粲彼
西園公雲霞注丹液不知歸何峯瓊鞋親手擲倘果山
中期飈歛攜所適

爲張長洲題四世恩榮冊

雨露青葱挺桂林雲霄喬木並棠陰重臺仙令雙鳧候
百里吳天萬笏臨移劇已知調瑟手撫時初見濟川心
人傳四世公侯復不獨年來閱閬溪

奉和陸觀察座師枉贈二首

何緣空谷下鈞天
晉樂元來韻絳筵
點瑟春風歸已晚
邕桐餘鬢賞猶先
經趨顏色三城曜
坐散氤氲萬井煙
晞髮不須吟澤畔
滄波閒上釣魚船

其二

當年國士起微名
學得邯鄲數武行
射虎有心鋒蚤折
雕蟲雖習技何成
休將棋局山中覆
若問風波世外平
信是無聞梓老大
菟裘今倚尉佗城

酬龍川宋明府

茂苑王生素所親論交因念腐儒頻絃中山水皆稱妙
海內文章獨有神楊柳陶潛堪試令桃花漁父也遶津
縱憐絕世長門色閒殺當年作賦人

酬大司馬劉公

當湖碩大幾人同李白雖狂識令公草疏三朝心尙赤
珥貂八座數方隆孝陵襟帶江山裏浙水勲名指顧中
櫪密已回天北極登臺不爲嘯口風

飛霞子琴歌過小環谷作

越臺淒瑟商飈起山中桂樹清於水泠泠七絃飛霞子

谷音互答松篁裏我來元鶴幾迴翔風泉萬斛傾吾耳
一彈再彈還有情難將古樂合新聲此地悠悠今何世
此意寥寥誰與明酒闌無計能畱客而我攜君手不釋
振衣起舞天漢低擊節高歌山月白嗟子十二始調絃
朝朝夢枕如飛仙伯喈叔夜非比肩琴心獨往羲農前
二十束帶常羈牽回首風塵空惘然披豁爲君賡一曲
嗚咽沾巾聲斷續漫云海上去求師感君愛君君應知
但記空山落葉時

秋日白遣遂成長篇

生長海之濱所遇無全慧徒知讀父書頗與聞祖制洪
武庚戌詔創科草昧際時務需直陳簡略在文苑宋解
拔時流造士歸純粹累葉儒風開恩數超無二肅皇典
禮興考官不稱意剔發自英裁臣軀甘杖撻自憐輸國
非不中萬乘器弱冠遇神祖得事今皇帝父也入省垣
分直聯班侍諫劄傳人口金貂側目視賤子乃循資謬
登大藩使副考曠虛懷房司遵約誓一展生平愚以茲
當獻替未曉三人聲先徵五雲瑞馳闕進天子微文諒
不諱稽首論大權睿聰幸蚤計泯泯聖明憂將踵漢唐

季幾回矢劍心廷樞高睥睨前賢四諫稱聞之有餘魏
翰苑忝虛名耳食思羅致內外互夤緣同朝工餽試鄒
塢棹題新乞我元勲字餒我以遷除嚇我以械繫聞此
憤填膺拒客動高詈我生命在天區區敢爲崇肯以筆
札勞而供糞除隸中旨固隱微實與此時值賢書等臯
書所坐應謗誹父已駐天南褫奪傷連累一門霹靂加
妻子旅魂悸去國極踰跟中途糧不繼痛臥長江干伯
爲拂行袂入門繁華髮驚喜若夢寐母氏慰勞深父也
從容示疇昔省垣中久已灼此事纍若或非恩偕隱多

君賜我躬不閱後動色皆顧忌喪筭疾雷周高天何日
霽瓜葛盡株蔓四方走緹騎詔獄剝羣紳有若遊屠肆
出守滿邊津體貌凌大吏翼虎各負嵎可憐鷹鼠輩九
列厚奴顏三臺率竈娼尸祝流藩鎮茅土爵延世不避
勸進名且援專征例汗淖太學傍推崇配禴祭築怨歸
大工沈冤激天地輦轂千家裂數里轟震異煨燼朝天
宮虐斃乃益熾司馬發危言棄之若敝屣片語下綸扉
敷張代聖製盡倒文翰權苦欲箝一切屬意科場處臺
臺中而屬鉤常舉臣名招搖學術僞倡和一至今文編

密窮治草莽實不才母乃拾其細縹緲章句餘反復深
知戾淦淦秋風飄耗盡江湖淚耳垣正有人援毫一申
記有碩終須瘞有口合先閑

倣孔北海離合詩

早披八索寸絲不長仲尼博物缺一續羊湯泉旣浴空
谷白陽梅福遠蹈非木所航險阻斯止亦有共方五行
具體申寅並張是季是孟孰與低昂竄逃草澤或似蒙
莊翺飛三雀小者逸亡林際休息斯人含章豈競時彥
惟產中央

襍詩二首

四序周寒暑光景詎能同時哉觀化人蚤已明心胸行
逢伯陽子飄飄贊猶龍安期亦說項浮海渺霞蹤未許
道黃石且自歸赤松於世有信屈人智鮮如蟲

其二

天地勞我生百歲何侵尋勞生非一端逸我亦不任行
行復何意罔兩請息陰適燕而南轅歧路傷人心夸父
逐日走委杖爲鄧林

爲張邑侯贈公題冊

未成有道辟止就使君揚門內風惟樸廬居鬢蚤霜俗
憐烏鳥義人比白鳩郎高姓連天上端爲口弟王

其二

三冬頻愛惜一畝自周旋家學韋長孺儒林董廣川心
灰時甲乙手澤舊丹鉛誰識千秋璞璠璣口日傳

其三

達人爲可繼志不在田廬屯洛無爭汲陳留
有借車詩書爲政在鄉里買隣居畏壘皆尸祝
今看結駟間

其四

大業垂身後風規百里間生兒稱亞子爲政樂張君京
兆開阡道中郎定墓文雙飛丹鳳詔來向養堂分

代張邑侯門人題贈公冊

不愧賢良有道科完名身後竟如何一經世業來丹詔
萬石家風映五紵頌魯定知純嘏遠拜虞因就養堂多
只今海國絃歌裏門下何當有廢莪

張孟奇挾諸郎就試五羊有卜居之興

海上風煙黯自疑城頭東望已多時將因故國移居在
還果滄洲散髮期逸老未須陽羨卜清秋口上杜陵詩

月明何處飛鳥鵲羣玉團圓桂樹枝

八月十六日夜讌

拮据不可任薤葺遂斯隱此生與物遷秋風吹□薤清
涯錯水花梧篠多淒韻河宿經高臺纖阿蕩無暈恆抱
今故心盈虧誰與問張君旣敝博黃子復清溫井闌列
歐徐坐注菁華潤斟酌盈尊酒洗我胸中吝務爲良夜
歡庶遣白駒詠

訶林贈王丹一都閫

度世將軍現袈裟道願深麾幢元護法劍戟爲修心旣

上凌煙閣能忘訶子林花宮白毫相何地不鋪金

舒再航孝廉

相傳孝廉爲搜寧太史後身而太史爲無量壽佛後
身云襍記具載其事聞諸粵右縉紳間有親見者其
公車見訪五羊贈之

肯爲榮名世上淹現身猶自見楞嚴不知般若航應再
逆旅憑誰問孝廉

其二

風月三生石上詞循環人識顧家兒年來又隱朱題字

名姓親教臚唱知

訶林送區啓圖應試北上

歌舞文明五色同可知丹穴勝河東時名羣季偏相亞
藜閣依然任火攻

其二

淨侶騷人絕勝緣上方明月照離筵天香雅愛飄靈寶
莫倚淮南桂樹篇

其三

十載西京已腐毫誰家輕薄鬱輪袍段師一授崑崙朮

新譜楓香調絕高

陳文忠公遺集卷之五

陳文忠公遺集卷之六

明南海陳子壯集生著

練要堂集

詩

送詹弱生解元

曳履歌商未是貧誰從分席倦征輪一龍月旦人猶故
積水風雲世亦新西向獨含傾國笑東家空擬入宮顰
更憐款段隨鄉里不待鳴珂已絕塵

送黎美周

莫訝番禺桂高秋自一枝試看金驪裏恰對玉蕤蕤國
士懸書貴交遊祕帳奇吹噓何足問先入漢庭知

歐嘉可夢索予大書熟騷痛飲四字以詩爲質因
和詩而以拙書歸之吾亦踐吾夢之諾也已

騷懷兼醉夢何處不相求正遣商聲出都將白眼收世
情今雨盡名士故風流不律纔三寸爲君破十洲

四哭詩

四子名位交遊不同然以先後同時而落爲四哭詩
以備意焉

黃士明先生少宰

至質別人英精礦屬神鑄受物面清流居地□□譽誰
知參密危自欲引身遽數旬及終天顏□□孺慕城月
歇鄰春臺風障殘圍爲咽白雲詞□□桃榔樹

先生病中有白

雲謠與子唱
和種桃榔詩

歐陽伯曦參軍

僧院昔陪遊畱都悄相見金盡隨官牒禍慳入詩卷每
讀生還篇思揚義僕傳肯以屈江輕而易嵇琴曼天邊
貫索沈峽裏馮夷宴

莫元慎司理

公孫科晚暮連州紹伯仲白意支煩郡貞棲消薄俸方
委折腰勞隨牽出腸夢詩音流餘匠碑版慙新礪聞入
遮須逃知怪閭浮慟

門人袁高要若思

體牧一何謙縣譜洵云美浸滙九流識具羣羣芳理將
心孝肅堂寄口瀝湖水勞血爲田疇冲醇敷子弟何處
折哀絃桐鄉有垂祀

鄭太史旣遊羅浮訪我月泉精舍入小娜嬛同賦

擬從脈望隱鄉媛長揖煙霞小洞天佳句欲邀桐葉滿
新泉堪試月華邊遙聞芝草山中約已入梅花夢裏還
傾盞逢君頭未白漠庭休笑子雲元

舟中贈鄭太史

欲識江湖戀闕情碧山隨意貯蓬瀛虛疑江上蘆人避
實有山中木客迎石髓攜來金錯賤丹臺名在紫煙橫
遊心一倍憐捐珮今夜同舟權榜聲

和鄭太史

飲啄吟知足風花賦遂初操琴惟適性種秫自成居何

意瑤臺寫翻逢下澤車離騷多選句畱與墨池餘

自笑

出門真自笑叱馬欲何之詩酒千人敵風流一世師東
臯舒嘯暇南郭仰天時莫問青蓮子吾生後汝期

同鄭太史入訶林

浮來仙嶠客還覓嶺南禪觀世恆如是繡經亦偶然千
燈懸慧日一語到生天無媿支公會偏同許戴緣

酌鄭太史於東臯

竹塢亭亭任客看檻前煙水泛清瀾風流本自山靈合

天地真從我法寬舞鶴一雙形共影梅花三百暖兼寒
不教細撥琵琶語潦倒高陽又整冠

席上贈劉郎

世外卿家結束殊沅陵消息比何如真傳子夜生花筆
正及丁年擲果車采得芙蓉新作佩看來楊柳定迴裾
生成一片無雙璧狂殺尊前大令書

疊前韻爲公遜撥悶

一般明月照偏殊薄命由來意不如舊雨但能成好夢
長歌豈爲出無車九還藥試窺全鼎三日香難耐短裾

傳看秦庭空睨璧解紛重費魯連書

澹蕩

朝梳渾欲倩把鏡意茫然殘酒猶堪續疎花也自憐濡
頭眞草聖矍腹定頑仙澹蕩占身世山中又一年

送鄭太史歸毘陵

隱几江樓記絕峯飈輪誰識去來蹤得酬海上三山會
游戲仙人綠玉龍

其二

朝暎夜月叩蒿萊袖裏芙蓉兩不猜不是洞門扃歲月

幾人曾訪玉書來

其三

自種因緣亦似僧
丈夫身世豈無憑
桃榔林下堪棲憩
重話菩提一夜燈

其四

芳杜應移楚客心
木蘭新倚越人吟
思君清夢飛南嶺
得似羅浮雪片深

崇禎元年元日立春歌

一統常逢第一編
春王正月繫元年
何如三朔班春候

陳音公集卷之三
五
累葉中興豈偶然

其二

拜舞今朝樂有餘
農耕堪試卜牛初
君王已自除璫虎
不比徒聞寬大書

人日舊好諸君攜酒過

草堂何日不幽清
朋好新年娛晚晴
三紀已憑雙眼過
一尊莫照二毛生
詩篇盡我隨君和
春洞飛梅帶雪聲
誰信論才非用世
逃虛無計謝時名

諸君再過

流水軒車破隱淪天桃未必勝迷津
疎燈襍雨難爲夜
比舍畱歡是此旬
詞客情隨芳草合
小兒歌進太平新
煙花若問長安麗
一謫金門亦有因

燈夕過區嘉霽

春色高齋已十分
九衢車馬漫紛紛
燒燈有意畱明月
度曲真成伴彩雲
寶樹崢嶸偏自愛
玉山傾倒爲誰醺
相過里閭尋常事
今夜何其一問君

詠史二首

漢季朝廷輕隨風
傾李杜一朝黨
構成殲夷盡頽汝
含

詬獨弔喪全宥乃無數以彼道廣人行誼或容與褻裳
而幾先天地隨吐茹不見申屠蟠颺若靈鳥學生名殺
我身永佩嚴公語

其二

狄公絳侯手產祿牝朝當偉哉國老名虎口不見傷絮
書得金字勢足殺二張承反何悒壹褫裘何赫煌不待
吉瑱言已歸廬陵王明前種桃李默默爲安唐堪笑婁
郝輩長厚安所將幸自免羅織尺尋不可償

智海修六若惺三上人過訪同賦得風雨亦來過

獨坐千林色堂虛小景偏衝泥今雨興翦燭故人緣是
否龍聽法依稀鳥弄煙三湘圖畫裏看竹更天然

過木之濠想亭畱題十四韻

曲水繞城南徐卿此結菴前臨九曜石渾是百花潭淨
梁閒魚戲和颺繞燕誦蘿衣緣控帶苔髮沐鬢鬢竹屋
窺張薦棋枰對李愁風流家五柳真率客雙柑逸格蕭
蕭出文思處處覃玉壺一片在赤水幾回探求友詩俱
和驚人句自耽書牀開卷畫衣桁泊煙嵐夙有深山約
聊爲委巷談春畦分藥得新醅別泉甘清樂偕晨夕餘

謹醉二參東郊遊興早車馬任驂驪

悠悠曲

何日不悠悠江花江上流借問桃花塢幾度本蘭舟

其二

春陰亦已緩春草亦已長良夜非三五起視明月光

其三

昔夕真何夕規缺又三分記得殊未滿那當特贈君

其四

八行錦字多一字珠百斛就裏拈一珠時時向花卜

智海入羅浮送以四偈

浩劫微塵本自該鉢頭何以向山隈說來海上曾浮嶠
方信人間有渡杯

其二

鮑葛丹爐他自封法雲長引入山鐘閒將一滴曹溪水
飄落羅浮四百峰

其三

咫尺迢遙不可知
飈輪相就更何時
好遊最是東坡子
生長眉山不到眉

其四

世外無情更有情
梅花清影立三更
勞君一喝空山月
又見扶桑海上生

訶林新闢禪社吳用潛聖卿十虛上人繼至

佛日香林報夕曛
靈花祇樹倍繽紛
千年筆授人如見
七葉衣傳偈亦聞
繫馬從參都講席
行瓢方乞募緣文
由來十八高賢會
莫遣延之詠五君

爲弈客黃生贈父

自愛君家萬頃陂
交遊隨處識牛醫
傳中若箇添高士

書就分明達武夷箕踞科頭看世上雙柑斗酒聽鶯啼
丈人可是無機事瓜葛還爭數道基

送袁自如少司馬還朝

曾聞緩帶高談日黃石兵籌在握奇回紇傳呼惟郭令
召公受策自淮夷追鋒北向趨三事露布東征寵六師
此去中興麟閣待燕然新勒更何辭

題李都護小像

任取丹青與畫師虬髯燕領世間知肯將三尺芙蓉劍
空作并州遊俠兒

春興

樓閣粧春勝
畫圖雕籠鸚鵡
太相呼不知
院落鞦韆影
金烏花鈿定有無

畱春詞

花發津亭幾樹殷
十千容易醉紅顏
江南江北如相憶
只在鶯鶯燕燕間

其二

霸國江山錦作堆
一春無恙幾登臺
木棉花落啼山鷓
歌舞岡前許再來

其三

樓下春郊白馬嘶
樓上佳人玉筍啼
自是王孫歸未得
肯將芳草怨萋萋

其四

春望望江江水流
柳條難繫木蘭舟
儂今欲采蘼蕪去
忽漫相逢拾翠洲

其五

三萬六千醉不辭
勸君行樂及君時
年來怕作秋風賦
已入潘郎鬢裏絲

其六

遊冶兒郎亦太顛騎馬看花已十年北客昨來還借問
皇州春色尙依然

其七

花開花落一禪龕欲結三年半日談愛水情根如不了
依稀來證老瞿曇

賦得首夏猶清和

羲氏鞭日車滔滔次南陸暄美良有餘恢台如未足闌
薄泛莠與歷歷庭端木棲頓有延景經營無畏旭雖耘

下撰田恆嘯東林竹若櫺殷畫榮紅芭粲朝霏偃仰天
宇下游戲滌池曲幽廊帶合弛新沚纓斯濯旣展茂對
情信與風候睦更獲同懷素時哉以爲勗

賜環紀恩

萬里天南拜詔頻丁年袍笏又從新棲遲厚祿曾非據
註誤微名蚤見伸有父固應聞諷議無才終不老閒身
庭旋車馬休嫌隘自是先朝草莽臣

其二

豢養君恩涕淚餘中興猶復問樵漁天憐部黨俱弛禁

人喜名家漸拜除
咨訪輒當裴相識
疎慵無藉子公書
而今一憶元都樹
未信劉郎恨不如

欲將

海國春無旱
連春旱不任舉
天雲漢詠匝地
桔槔心繁露
皆兒戲
重溟有盜侵
欲將雙淚眼
灑作一朝霖

讀黎君選中州諸詠作

入市恰同公子轡
遊梁初上孝王臺
臨風不用思賢達
獨把新詩次第裁

其二

廣文先生囊不空閒攜童冠詠春風相傳洛下書生語
盡解人頤七字中

送吳璽卿兼寄何宮諭

木脫山中屐高懷見璽卿梧江清瘴遠蓮社碧雲生覽
德輝千仞承恩醉五城和詩金馬側應自問同聲

其二

禁侍吾鄉彥皆稱賀世儀日來殷大禮君去赴清時星
月班階候風雲殿柱移彈冠吾敢晚猶戀菊花期

尙書懷

增城有荔枝後諸種而味特旨相傳尚書湛公出而懷之

嚼實圖何略呼名譜未諧不爭妃子笑得人尚書懷

黎仲賜

亦荔枝土人得種於黎而嘉其稱

黎仲者誰子將來奪宋香飽自宜村舍心先獻尚方

北望臺

臺端夾雙柳冉冉爲成陰佳月能無礙閒軒時獨臨冠
宸明主意枹鼓故園心俛仰堪天地誰知此夜深

菩提壇納涼

百年偕淨侶三伏辟紅塵卽此袈裟地誰爲徧藏人有
聲都作雨無日不留春隨意幡風動端宜掃石論

夏日曾元魯方伯邀同修若二上人黃弈客閣集
夏閣兀平林清談白晝深晴山當一面風翠恰盈襟鶴
過時畱影蟬移不輟吟看君有真賞弈旨與禪心

賦得莎鷄振羽

天生羣動應不獨女郎絲微細關人意遷流赴雨時三
秋催轉急六月振先知暑憩花陰值宵行草露疑是聲

增索莫何事每淒其爲憶
爾風句沈吟星漢垂

陳文忠公遺集卷之六

陳文忠公遺集卷之七

明南海陳子壯集生著

秋痕

賦

太平鵲賦

并序

予步掖門見鵲羣飛入太廟啄松子毛衣甚都云太平鵲賦之

伊孳毵之何方亦翱翔而成族蔽越裳之翡翠驕建章之黃鵠絢采襍而生文莫損益其紛郁占賀世之劭名

謝虞機於斧斨宜小過以遺音羞喑噴於覆軸望廟廷
而不眩此累恩兮若木寧軀弱而宇寬毋搏擊乎踰曲
將學語以猶人旋照影而自驚慄皇神之在茲幸免妒
而遠辱展窗窺分蒼會泛枝柯兮霑足縱轂雛之罔知
諒因衷而表暴顧蟣蚋之祿命勞握粟而出卜否乎雉
雖於彫日休者烏流於火復其若斯之渾忘以載飛而
載逐乎

沙雞賦

并序

沙雞西北邊鳥也□騎數擾沙雞無止冬月薄莫羣

飛過都如風斯陣後飛至江北食禾稼鳳陽守臣以
異鳥聞

夫物疇微而無徵性奚遷而弗革名禽經之罕詳形迅
駛而難索度野馬與塵埃息相吹其逍遙初口疑於眾
羽簞比屋以飄搖跨陽鳥之遞征泥鷄鷓於魯郊彼六
鴝之退飛或鷓鴣之來巢聖惟茫而必剔蠢以亂而益
噪秦吉了曰我漢也而不胡入豈若胡也而漢之逃鷓
回訖兮鷓鴣突厥阿得脂兮甥博勞從連雞而目并觸空
廬以爲高幕有鳥而四起城千雉兮將翔羣逐肉以頓

盡味長尺其猶饗韓盧反獬虎偃晝號沙蟲祝化猿鶴
周遭是以閨閣饑思於空倉纓冠膽豚於乘軒迫夫迷
蓬颯發望望星奔日意飄潛脫葉脰喧亘重障其閃爍
有隔脰而摧魂若乃總鉦欠出艚廐在屯沙烟柳雪
井塞門石馬間嘶餘殞連墩雄雌旣剖弟不識昆梟音
何徙鷹眼耐存搶天窟地爲醜滋繁越陌踰阡穰極秋
翻刑蠶蟹使鵠啞執紆舫而並吞若有人兮共蜡主帝
使益兮繫其羽系曰倉庚于飛九鴈忙坎坎伐鼓築我
場抨我弓兮相舉柴挾我矢兮烏三至蟲併飛兮肆無

害失前驅兮邑不誠

琴操

幽思

蹇猶人兮生獨
躋倏星漢兮倏重淵
朝不得見兮莫不得言
嗚呼天兮

二

引彼彗星掃壁府兮
鳴鳥不聞
靜韶敢兮我心則明
歲不與兮

詩

徐馮諸君家弟送別三江舟中

徵書未許遂微情
尊酒還勞勸遠行
夢寐五更呼手板
江湖何日不心旌
梅花短笛風初折
蓮葉傾舟水自盈
鶯谷鵲原多羽翮
薄言天際有離聲

曹溪

佛性無南北
繇來不二門
拙衣圖得寶
酌水已忘源
大地逢人說
空山有偈存
疎鐘祇樹下
看墮聽經猿

二

祖法初航日
恰從南海湄
涅槃真有信
展轉復於茲
隻

履猶前度歸根正及時可憐同淨域瞻拜在臨歧

與倪無夜坐寄示訶林諸衲

寶林經雨宿聲色淨諸巒心襟辭靈運身輕憶懶殘水
田僧結夏金粟鳥分餐爲報菩提種生生覆戒壇

嶺上

朱明不盡曲江頭生長能爲柞械謀
論是越裳梯貢路至今一線順神州

圓通寺

一壘新泉有妙音殘僧疎磬越蕭森
到來欹枕松窗裏

知入廬山更幾深

東林寺

有序

寺以白蓮名其根千數百年不現并池荒茫萬厯某
年現於神運殿前一花今年而三之大邦適適導余
畱四十字

胡爲安午飯無乃復東林蓮花窺諸品如發遠公心點
滴六時漏迢遙三笑音僧莫但饒舌空香何費尋

潯陽曲

揚州大扁截珂褰窻屋連簾上水歌爲人只道招夫婿

心比長江九派多

潛山道中遇雨

半天鳴籟四疇搖一望翻瀾眾渴消道上逢人堪假蓋
水邊何事更懸瓢農家翠竹編初就佛國青山步不遙
借問行行車馬客依稀還叱舊溪橋

宿青口驛樓

眾鳥歸飛信自繇紅塵纔散卽清幽山圍皖伯天連樹
人豈庾公月滿樓欲見長安多似日遽然一宿乍宜秋
只今吳楚東南會歧路非關歷國愁

竹枝詞

積歲官租此歲償
青青無土復抽秧
知他剪盡禾中草
若箇丁兒出手強

二

淮北拋荒已漸多
爭乾爭雨奈時何
東庄秣蜀西庄麥
愁向南人說稻禾

三

片片蜻蜓爾但嬉
踰田跨野揀新枝
蜻蜓未解將身化
撼樹西風憶爾時

四

遍地連蔓瓜色新
噉瓜休問種瓜人
道傍縱有高軒過
遮莫柴門野草茵

五

屋冷鴉飛村路長
大姑行嫁細姑忙
倩紅不耐單衫子
撞著前頭鐵襖襠

桃山驛

唬虎飛鷹掣似兒
等閒幃幄笑談時
桃山亦近符離在
莫倚遺宮泣宋師

一作遺宮亦近符離
在莫倚朱仙泣宋師

穀城山

消息弓藏鳥盡餘椎嬴籌漢等何如穀城原在行塵裏
黃石還疑世外書

東平逢陸景鄴老師

幕府蓮花近已開舊時桃李可能培衝炎不似山陰棹
叱蹇仍追薊北臺廟算探囊無一二時躋問路免迂迴
職方諸將關宸顧匡濟山東正論才

近京

泥雨浹旬餘晨光發玉除兩行瀛海樹一飯鄭州魚漫

刺煩相向喬柯想舊居識途高馬齒努力尙鹽車

賜鰓魚

一人班聯已素餐更循資序卽鴻磐寸心何以獻天子
尺尾初傳榮講官日下南船兼驛至宵分宮燭數籌歡
親闈七著今回首旅食先嘗憑報難

爲陳謙茹太史兄弟奉壽尊甫澗雲先生

太邱道廣宜賢後二子聲名掛北斗吳中四姓不足豪
漢家萬石茲能有安歌鼓瑟羅中堂文茵錦勝榮而雙
報道金華暫辭直萊衣猶似鸞鵲行國琛元圃照人如

共傳出蚌報恩珠不信試看滄海月歲歲年年春滿壺

題紙壁十二韻

全生珍木上寄食碧梧西
脆甲宜蒿苳明湯有蔕藜
步工司隸馬齋禁太常妻
按策占雲物封章刻日圭
漸鴻行自得凡鳥到曾題
愛我多捫舌憂天或噬臍
孔周徒夢見李杜枉名齊
舍館先人澤遺簾諫草攜
未知承顧問已事得參稽
鬢變將秋葉丹披向露萸
奮身隨八極秉性乃中閨
消息皆天意何當道路迷

送劉半舫大司空總督河道

殿履新高面拜除轉咨臣計重河渠蛟龍始識陵圖在
鴻鴈終招澤國居棠蔽東人更竹馬葭明草曲自樅車
可知職貢千艘入不礙飛流九派如

九日

講殿陰移得暫閒
餐盤節宴已先頒
憶家夜損三秋夢
傳蹕朝登萬歲山
獨馬微風紗帽著
斷鴻新月菊枝慳
清時易許論勲業
消受光榮一醉顏

盤菊

花朵京城種復除
大都密窖寄根餘
移堦試雨風霜性

亦遜堂陰氣色舒

二

出色奇名品第加送傳盤藥小盈車上尊濃勝江州酒
官舍蕭如處士家

等是

等是修眉誤點毫遠山秋色若爲高而今猶按龜茲譜
多少楊家肉陣逃

冊封

貫寵刑家吉班儀執事虔共看金冊出特使上公傳藩

器宜皇子宮釐啓奉先嬪嬙夙虞德壘葛定周賢

送喻大中丞巡撫浙江

獵獵秋風捲節旄雄聲先已駕江濤人當蠶落空談虎
天洗蛟門有斷鼉君子六千金氣肅羽林十二壁星高
賜旅釐卣珍朝典輕笑儒生睨寶刀

遙遙

酒戶冬嚴會不稀菊盞秋老更能輝遠遊反束登臨日
相對能忘錦繡園別有賦苧諳物性忍從相馬失天機
遙遙百越浮諸島寧使樓船信息非

晨坐齋中和張曲江先生韻

一室事掃除圖史寄幽矚先度靡云遐後徽庶可續蟲
飛動牖風鳥入噪庭旭物化累紛員纓綾肆纏束屏營
亦固然筋臂非不足恐逸曾史經且錯伊周躅南山許
儻素斯言達鄉曲

黎美周過別

芳歲卽我與其如津路長非多鄉里賢落落滯京疆新
水流好音處處諧春陽獨持徑寸姿延輝照匡牀玉麈
襍坐次金徽汎而張大雅只清越皇風誰爲揚醕酒興

三復遐矣莫終忘

有酒

門前有酒名終日飲其醇客來復解帶待我勸逡巡比鄰歌吹響變爲泣聲頻銘旌高刺天芻靈揚道塵親戚紛相送冠蓋果璊璫北邙一以返聲勢赫要津不知光景易此意竟誰申灼灼桃李花到日等荆榛

送董思白大宗伯加太子太保予告馳驛

帝念先朝有秩宗班階流輩盡雲從近傳宮保歸黃髮遙望天人間赤松楊柳青門真祖道桃花春漲卽吳淞

纖塵拌不隨清夢還傍東華五夜鐘

送姚岱芝大司寇還畱都

手攜金鏡拜前旒掖省高名領爽鳩魚藻恰承丹陛宴
鶯花仍作白門遊兩都人物輶中覽六代繁華筆底收
今日安危煩顧問履聲何異殿東頭

畱懷母舅朱箕作先生

桃花水濶九江濱蘭槩經時一問津媿矣劉家評月旦
難於郢客和陽春牕間蝸篆攤書後谷口鶯聲對酒頻
不爲京塵能障目停雲兼寄倚閭人

賦得陽臺

巫峯一十二流媚楚江濱夢裏朝兼暮臺邊妾是神君
王思絕代詞賦紀青春泥殺分香伎西陵總帳塵

耕籍禮成恭祀

天子親行畝微臣相秩宗清塵傳蹕靜瑞靄出郊濃
柳喧靈鵲華芝結袞龍普天應有兆九穀任三農

二

雞聲傳紫陌雉尾下青陽列宿輝庭燎和風皇山香
臣呈耒耜田畷卜倉箱不惜三椎力從茲食萬方

三

南壇將十里節候屆春分駕拂蒼龍氣旗翻白鵠雲金
螭環七萃玉勒控千羣再睹胼胝后教人四體勤

四

農歌唱復和僊樂奏還停燕享羣工悅謳吟萬國寧禮
成沾旣醉德洽展惟馨大有年先祝桑田雨旣零

十二駿歌

惟昔神廟御駿十二一曰玉獅龍二曰赤電龍三曰
戴月烏四曰五花駿五曰彩麟六曰文豹七曰金麟

八曰絳虬九曰攢玉騮十曰元雲驄十一曰躡雲驄

十二曰五花驄

顯皇太上貴清靜安不忘危嚴罔政三千駮北盡調良
十二天閑日蕃盛玉獅之龍特賜名勁毫柔毳鍾金情
雄姿一出駭虎豹凡馬却避不敢鳴復有赤電影若滅
口噴紅光汗成血白鼻驕嘶朔漠風碧蹄踏破燕山雪
烏名戴月駿五花光如匹練媽如霞彩^麟文豹爭蹀躞
金麟絳虬彷彿拳毛騮復有驪驪號攢玉曾從渥洼水
中浴三驄先後齒更齊紅錦元黃間追逐萬歲山前宮

草春至尊御樓宣圍人珊瑚爲鞭玉作勒天街飛鞚不
動塵霧鬣風鬃各馳驟須臾解轡歸內廐繇來聖代有
眞龍羽林萬騎瞠平後天之厯數四紀長平明息戰華
山陽皇人壽穀可坐致始信人間有吉疆

四駿歌

是爲上御馬紫點花黃驪馬一匹賜名曰太平駒粉
青驪馬三匹賜名曰玉龍媒曰吉良乘曰璿臺駿也
上階煌煌耀寰宇中有星精爲造父遙從傳舍墜天閑
化作飛龍翼神武岡寺孳生多逸羣名藩進獻爛如雲

公徒無事閒遊獵長成赤汗兼蘭筋官家酷愛止四匹
太平之驗負第一紫花點點綴乘黃御仗光輝綢朝日
青絲絡腦金盤陀追風躡景何啻過尙方豢養真無並
吉雲之草玉山禾次有玉龍媒沃若銀鬃雪尾稱維駱
瓊島春雲任躡翻太液晴波慣超躍吉良之乘馴且良
唐家六廐避鴈行旦而刷燕夕秣越不與凡馬爭騰驤
最後一匹璿臺駿三花飛鳳文成印曾聽西母白雲謠
九色斑麟倍輕迅方知倣儻更權奇我皇致此服九夷
圉丘方澤間一馭金輿玉輦相委蛇燕昭築臺高突兀

劇辛鄒衍徒駿骨不惜淋漓錦障泥爲君立掃長城窟
偏當巖險見豪雄矯首天衢如踏空誰能趣步詭遇子
依依棧櫪論餘功

祈雨部宿呈李金峩太宗伯林鶴貽左宗伯

自傳春仲親耕籍天下三農望帝家星鳥踰時催布穀
銅人刻日候文華研池汲井杓占策書案盛香吏報衙
豐澤若隨皇念注難將涓滴壓塵沙

祈雨齋居

大官方減膳私第且停杯步宿如家食朝雲向晚開蟻

遊枯樹側鵲噪嫩林隈無數煩憂積中宵繞象臺

二

湯年旱頗奏似欲試桑林星近槐庭亂天高玉殿臨遲
迴田畯喜省惕庶僚心一接黃封後須同惜寸陰

欽遣雲太歲殿

雩壇司歲事祝版署臣名咫尺連郊路如何格聖情柏
林星月淺香案霧烟平卽有崇朝願穰穰共報成

卽事

君王眞省歲曾否喻閭閻不信春秋傳都宜甲子占官

祖天下損市禁日中嚴似負求言意囊封有忌嫌

二

節年災青易隔歲未湔除孝婦寧無塚鄒陽漫上書所
傷吟猛虎何及泣枯魚縱擬炎蒸到猶聽破蟄餘

三

有田施子粒何籍問丁夫異地秦吉了空城尾畢逋生
兵零楚蜀殺氣劇荒蕪可恃宏羊算天今數豈殊

吉讀
機如

阿刺吉字

胡音也

四

從軍聞蕩子南北亦無期
天上黃河涸沙邊白馬馳
落榆不著土新粟況如絲
一日安危得千鐘傳致時

送林鶴胎左宗伯暫假歸省

負劬追陪禮樂卿五雲三詔許陳情
御筵稽古經初輟客路逢秋夢亦清
鈴索不驚萱草舍版輿歡度刺桐城
槐軒寂寞齋居裏其那孤吟百感生

送陳文是掌教南海兼寄諸里友

吾土之官易同年感舊勞
宿名畱乙榜真卷貴儀曹
不
倦雲中翼相從海上濤
心知賢弟子多有妙音操

雨後東掖

西峰雨不乏東閣快相親
鳥傍霏烟起雲隨曉葉新
傳呼移大內灑落出輕塵
獨憶追趨步俱爲感激人

後湖

沖瀨不計畝陂柳許多侵
半是丹樓影全消白鷺心
虛亭無向背隔寺隱高深
一雨思新澣從人自息陰

喜雨用謝膳郎韻

朝上團雲闇疑旋看入地
已淋漓白茅一沐寬湯禱
華黍三章擬束詩爽動夾
城飛燕子濃深別殿溼臙脂

明朝報祀諸壇後萬姓芳郊仰受釐

壇夜

郊牆遶空曠四野宕遊埃不向西壇靜那看北斗迴有
香皆寶篆是羽卽仙胎未報歌鐘起天門已自開

虹

仲夏雷方出晡驚蛰蟻長半天雨僧積四海日相望施
伐空螻蟻觀覘在犬羊高明當位列不敢對穹蒼

次酬遵義守黃大次

廿年蹤跡雨飛如容易疎燈散客居奔走莫言疲遠駕

續眉猶似對公車殊方棘道新開郡同學臨川舊著書
羨說次公能報政才華何復惜應徐

供祀北郊

琪樹濃濃蓋壇官簇簇珂自天分北畤練日正南訛明
水初斟潔空桑八奏和迂思寧極理得一亦無多

邊報

騁逐驕王子先秋已合謀會當一雨溽坐使萬羶愁望
邏黃花口催番白草頭長年生牧地駝馬不勝收

復套功非擬收降意亦危只今誇羽獵似欲變旌旗
兩插多兼并東江數叛離獨看□運去憑仗信天時

傳聞

遠土生何薄傳聞心益煩匹夫無懷壁一水即招魂
則養終鷹眼議關失虎門南征非惹惹推轂敢云寬

隆德

真成隆德變時事已焉哉大算縱橫失中興翅翼摧自
天生有血出世戰成灰二士殉皆去孤忠兀不回和戎
羞五利罵賊憤三灾莽莽衝星劍蕭蕭築將臺秦庭七

日與宋玉九秋哀只爲麒麟絕何年繪畫來

閏八月十五夜同吳長吉院長姜燕及劉蓬元二

宮端集馬園

秋色依人白玉京園林猶許借西清一官自笑黃楊長
永夜誰畱金鑑明閣道蒼涼連漢影女牆搖曳度邊聲
若爲時節一杯酒易遣風沙千里情

詠史

大樹無言自息機蔓條有刺只鈎衣諸君若畏饑蛟起
拔劍橫流看飲飛

題太平漁長圖

黃木灣頭海氣連
滄洲明月穩龍眠
無心更擬元真子
任展煙波是釣船

送順虎家兄宰貴縣步李太白中都明府韻

宦譜蒼梧舊府君
郵程先遣過家聞
秋高旅鴈聲相切
日下仙鳬影自分
懷古未封丹竈火
望鄉不斷九疑雲
登臨記得茱萸遍
數盡南飛到北羣

壽姚永言給諫封公孝廉

被服精華亦隱居
側身淮海洵信忘
魚陽春索詠梅花句

燈火閑抄貝葉書，閭有白鳩隨刻杖。可容駟馬及安車，十年自厭孫宏策。并屬青蒲視草餘。

爲陳湖仲進士大父壽時尊甫新遷國博

世家誠易識，同姓復難忘。諸子高陽俊，令昆大父行。受書惟孝友，應詔自賢良。無媿公卿長，兼難元季方。喈音元扈上，丹木峯山陽。風積天池羽，蘭滋大國香。泥金喧賜第，冠玉動名郎。少小升卿字，崢嶸祖德章。研田逢歲近，璧水衍流長。負局偕樵斧，敲鍼倦釣璜。出關爲李耳，入市卽韓康。元有書千馬，青窺藥一囊。如雲鳩杖祝，湛

露雉羹嘗駟馬初過里三鱸日到堂魯公從拜後孔父
益循牆南極衣冠氣崧高日月光看花逢甲子吹律中
龍箭聖果三眞授璫音八會興方諸修桂樹圓海浴扶
桑怪爾雞窠出兒孫乳不妨

曾謙父以且園詩見投次韻贈之

爲園恨不息深深搖落猶餘半畝陰雪裏芭蕉偏可畫
柯亭椽竹有遺音踟躕好爲舒長袖慷慨憑誰折寸心
一自詩箋才鬼哭風檣陣馬等如林

二

逆旅相逢只當家眼前開落幾秋花東方亦索侏儒米
寒谷非生博士瓜便以過都高相馬不妨入市小遊車
新詩忽動官梅興消息人間夢綠華

藕泉

在香山蓮花峯下伍國開屬題

好事能將勝事傳茶經都合水經箋便因舌本青蓮法
重訂江心第一泉

二

輾轉絲牽只颺空清冷不著自泥中世間亦有如泉酒
堪摘孤根試碧筒

三

能從岳頂問三峰
長奉金莖霄漢重
咫尺香山消不得
萬盤寒玉落芙蓉

四

雲瀑樵西唱采茶道情
三老便移家香山近日饒
鑄鼎
掃拾蓮峰瓣瓣花
方文襄湛文簡霍文敏爲西麓三老
國圖與何李二公交書用以相期

直講紀詠

有序

崇禎甲戌冬十月上連御講筵側聽細繹雪朝不輟
傳以春秋更通鑑進講時講官
臣子壯暨韓宗伯日

續姜宗伯逢元姜宮端曰廣倪宮諭元璐劉翰撰若
宰至是又補耑經文宮詹震孟凡七人蒙諭講書不
拘忌諱親批閣揭春秋歸賄一段正見當時朝政有
失所以當講後以此類推臣子壯仰觀聖學越度今
古非恆所擬姑紀述一二以志恩遇云爾

絲綸知講履聲閒正字鴻臚檻外班纔折一躬開起止
丹心吐出殿中間

二

稽首颺言一再申上容淵穆俯微臣情知齋室先瞻拜

五帝三王列聖人

三

眾流元意委滄溟
燭火何當借日星
長接儒生溫故業
揣無新語聖人聽

四

中肝寸激矢臣愚
卽笑江陵直解粗
通鑑盡刪閹宦事
幾能翻却帝王圖

五

侵朝傳奉出文華
勞念微臣體數加
巳午從容需講次

直房消渴一杯茶

六

我明經學統前修上下千年大義畱更補詞臣尚進講
不虛聖志在春秋

七

春秋觸忌正無妨御札親裁重數行要見當時朝政失
悠悠袖手看冠裳

八

篝燈催取講章成退食尋思字句清不異大官供給數

頻勞天語喚先生

九

睿算雲西□退餘進臣連下幾籤書幽風亭上思清燕

不願功勞汗馬如

世廟西苑蘭風亭落成令輔臣進講賜宴故事講官言敘與邊功同

十

書籤舉袖若爲寬時值天顏一笑看對案氤氲香百和
殿樞不覺錯風寒

十一

尊俎無能勸一籌兼資章句備宸猷講規刻日中書派

文牒分忙部吏投

十二

鵠立東華飛雪朝君王步輦出宮遙懸知青史堪圖畫
寵遇橫經勝賜貂

送胡南石侍御巡按貴州

英僚除目冠臺差聽唱東班卽往諧羅甸遙思持節入
都亭先見有輪理不辭敬梓批單疏曾信安苗化兩階
是處叫天俱尺五何言萬里易陰霾

汪生洲左司馬致仕將歸授其先公詒燕圖作歌

多懷舊之感

誅蕩天門乍可呼明星搖動應中樞勲名未蔽凌煙閣
都人看寫二疏圖如此歸裝良已足懷君念友衡山曲
縹緲只欲借留題傳示趨庭影數幅展玩尋思踰十春
手澤音容粉墨新一燈父子傳經夜襖被寒溫待試晨
斗升亦並明廷對看子成名仕不再爾時清白畏人知
微言全譜忠經在曾驅四牡遂遑將曾奉疏恩到省耶
扶杖瞻天天尺五陳筵愛日日初長至今開圖有感集
慈烏時動皋魚泣身都九列不爲卑况望松楸勝賜紙

荀陳兩世稱交遊長歎之子盛箕裘蓼莪不共王褒聽
恐入山陽笛裏愁

馮楨卿給諫爲尊人青方新開園亭邀同盧本潛
都諫過酌

名園不羨辟疆同青瑱郎扶白髮翁盤上生蒲皆九節
花邊調鶴似雙童干霄慣灑湖州墨卜夜還談碣石風
舊客肯教狂阮籍獨持清賞就王戎

二

韋曲花開卽共娛杜陵佳句不應孤舊來好事今能否

中有高堂天下無酒密歌長寒易借廊深樹曠月全鋪
願逢直省多休暇又度春風白玉壺

爲馮青方銘杖

七尺之筇五尺之童何以御之老子猶龍

觀黑帥還朝圖有感

間關水草遠如期宛馬長鳴識貳師天子至今閒羽獵
上林秋鴈弋書遲

何象岡相公邀賞洞梅卽呈絕句

和月和煙盡一歡一杯杯到不曾寒要知京國春如許

爲放梅龍小洞看

送劉瞻甫州守左補江西幕

多爲軍儲費量籌難辭攝縣太倉州西江聽得吳儂語
紆鼓雞鳴挽不留

望雪

臘節將過雪不飛四郊人暫曝晴暉應龍久蟄雷收響
信爾叢壇合禱歸

二

天意曾同一日風肯令三白笑田公紛紛占繇知何準

南北陰陽訝許同

錄古作籀

三

愛惜含英玉一窠
露寒密暖底調和
寄書黃耳休驚吠
香雪羅浮望較多

葛贈公專祀詩

人高鄉月旦俗下使輔軒小學方今授通儒自昔論
咳蘭當節媚林笋及冬溫讓叔二分業含甥一本恩
書繙孔氏壁金擲管寧園有道須旌辟公絕與援諸
生半魯國亞子直黃門皋鶴聲聞切山龍獻納尊移
忠爲諫

草於道卽微言
晄靄扶風帳
青葱下馬原
不忘深水木
每易薦蘅蓀
今日靈光殿
依然漢獨存

雙塔

神島丹邱若箇邊
西山雲日淨
諸天雙藤僕僕巾
車引笑殺長安雙塔懸

靈濟宮

只當元都一度餘
朝天宮在火煙墟
馬蹄閒熟祈靈路
看演鳴鞭拜玉除

梅花

暖屋周遭靜掩扉故園蜂蝶到應稀
好風窗紙須吹碎得任梅花作雪飛

自是佳人不可期況隨病骨強支離
今朝看著沈吟醉年尾年頭總未知

爲顧珠巖給諫壽太夫人

自種忘憂色倍榮俱分擎露到金莖
家筵易入江魚薦使節直迴天馬行
閨法元常彤管籍薰修南嶽碧桃笙
山龍袞職多需爾問訊斑衣大笑迎

春日道院奉和王師相

徹城車馬劇於此亦銷忙草色春侵院松聲晚韻房玉
壺將月貯寶鼎合煙藏即使山中相還勞辟穀方

垂絲牡丹

下馬金尊酒正勻啼鶯玉筯怨偏新豈因夜雨多媒妒
揉碎宮前一片春

亭上

沙草連飛太白雲南征遙度水犀軍閒中一散機心事
畱客楸枰過夜分

二

不使錢刀計亦勝牀頭無恙玉壺冰
近添飼鶴三升粟
更供慈元一盞燈

三

多謝侯門接植饒海棠紅藥不禁飄
西鄰樹大東鄰陰
雨燕風蟬暮復朝

送阮旭青給諫冊封德藩歸壽母

御仗朝隨出掖垣南宮簇簇動星
軒削圭帝子言無戲
如礪名山國永存漢節一花明濟
岸秦碑積雨洗天門
有懷正好歌來諗得望扶桑引壽尊

別意

三五流光亦可攀
玉笙清怨不消閒
一裝好趁如雲出
莫誤雞鳴急度關

二

只向官郵說短長
萬條煙柳任游颺
未經暮雨拖巫峽
誰解猿聲斷客腸

攜手曲

錦雞喚紅日
淥水絢青春
垂楊十餘里
樓閣不生塵
燕歲鶯年遂
相慕鴉黃蛾
綠新流顧誰
家女雛好嬌啼
牽

車爲向華山度

奉贈喬年伯

過市每攜游俠傳
閉門長習度人經
已知報國憑時命
卽論傳家有典刑
聞道關南多虎跡
思君雲表一鴻冥
黃鐘若協階符奏
吹到喬林百丈青

部中襍詠

有序

部署清簡聽夏木
吟蟬偶同答和乃
不自退篇什遂
加其無辭雕蟲猶
有童心獻諸同志
以資餘翫爾

鶯

豈自矜毛羽穿飛亦鮮儔
生藏嘉樹底日有好音流
不省金丸懼因辭寶瑟遊
齋居偏覺汝清嘯若爲畱

蟬

感爾能幽響如絃泛許長
大都吹玉露一半溢清商
院敞風皆奏人間睡不妨
無嗤終抱木亦足答晴光

槐

斧柯曾不試新葉自紛紛
一碧何如水層空只亂雲
文書森過日鳥雀晏爲羣
遮莫驚絲竹簫韶習奏聞

燕

主人看物候往往寸心消
海燕將春色年年一度遙
穿花時自喜帶雨卽同飄
爲憶張文獻吟詩鷹隼調

鶴

翻連毛羽大來自海天
寬啓戶雙飛至空階獨舞看
願爲君子賞譜入素琴彈
別有唳清夜相邀明月寒

二

側身終遠俗此地卽長生
臺上堪流頤花時得漫行
乍高琪樹影新澣玉池明
多少恩光在非同飲啄情

柏

雙柏槎牙立看成龍虎姿香枝或見掇苦幹定誰移山
作將軍號春還老子祠此間信時令生理露霜披

葵花

宿種多穿砌高花動壓林枯榮會有族蕭艾本難侵不
用迂迴照爭持徑寸心偶驚過夏半色比故園深

井水甘冽人來汲皆曰禮部井云

神仙開占贊風雨過閒亭猿飲如相接龍吟或可聽縷
煙秋葉下殘夢石林醒未必人間世滔滔有濁涇

沙窩偏近地新水引成槽涓滴分消渴闌干見二毛
皇差識別桑苧未清高竊有羸瓶慮將無抱甕勞

紫薇花

紫府花臨戶丹砂爲結胎輕盈能自豔凌亂不勝開
豈以身沾著都非意剪裁舍人美詩句書賜邇英來

茉莉

鄉園籬落物珍異卽傾都三日香隨席前生頂上珠却
清炎熱盡可和雪霜無消受南中載風流漢大夫

摩

風草能成性平坡似絕峯
漸馴爲撒柵好養生茸身
踐三清界眠高百尺松何
當寬奔走任此老閒蹤

榆半枯亦具古趣

昔賢論齊物不礙養生如
祇是形容異相看歲月除
風吹秦塞渺星掛漢查虛
便倩黃凝筆來添水石居

陳文忠公遺集卷之七

